

La carta del apóstol San Pablo a los Romanos

Pablo escribe a la iglesia de Roma

1 ¹As Pábloatan ba acu ayin carit uch cuihsuro. Asan Jesucristo acu cacumró. Sirat asan Jesucristo chihotá ehcuquib yehn áyjacro. Sirat ima chihotá ehcwayta acu asan imáy cájacro.

²Chihotá aját ehcúc ey Sirat imát récaji wac bahjacro. Imát uw cuitar waquín wac bahjacro. Uchicria ima chihotá ehcuquin quin chihotá ey carit cuitar cuihsú áyjacro. ³Chihotá ey cuitar Sir ima waquíj ojcor tew̄ro. Sir waquíj uw eyta yehnyat úchicria cara Davidat bomcarin cohná bic sícara bin yehnjacro. ⁴Carit ey cuitar wajacro, wacj ey ójcoran. Sir ima waquíj quéneyro, wajacro. Eya ajcan urán cuít étarwan Sir ima waquíj quéneyro. Eyra chiníc cuar Sir Ajcan Cámuran Eyat sicor estají yehn áyjacro. Eyta yehnjác étarwan Sir ima waquijró. Is Cara Jesucristo eyan eyro. ⁵Jesucrístoat as sehnác etar Sirat asan ima chihotá ehcuquib yehn áyjacro. Cajc istiy uwat cat, cajc istiy uwat cat, bahnáquinat Sir chihotá rahcuayta acu, cácyta acu asan eyta yehn áyjacro. Bahnáquinat ey tamo síhwayta acu asan eyta yehn áyjacro. ⁶“Bahnaquin” wacáyatra, ba ojcor cat wacaro. Ba cat Jesucristo uwro. Sirat ba cat ima uw jaquin ac cájacro.

⁷Aját ba acu ayin cuihsuro. Ba Roma pueblo cuitar itquin acu ayin cuihsuro. Sirat ba sehnác rehquít, ima uw jaquin acu ba cájacro. Sirat Tetát cat Cara Jesucrístoat cat ba sehnác etar aját ba cuitar conro. Ba obir yajcayta acu ba ohbac ítayta acu conro.

Pablo quiere visitar Roma

⁸Aját ba bahnaquin tamo seh̄war Sir quin ay wacaro: “Oquéy,” wacaro. Jesucristo chihotá cut aját Sir quin “oquéy,” wacaro. Cajc bahnác cuitar binat ba ojcor tew̄ro. Baat Sir chihotá cájaquey ojcor tew̄ro. Baat Sir tamo ay síhwaquey ojcor tew̄ro. Eyta tew̄yat, asan ahniro. Sir quin “oquéy,” wacaro. ⁹Sir ub

cahmar ba quin wacaro. Sir aját racar rehquí ey wacjât yajaquey uw quin ehcuro. Aját ey quin conyat ba cuitar tan chinti conro. ¹⁰Aját Sir quin etiti conro. Sir quin ba wahitay ben acu chícáro. It bica rehquí Sirat as ba quin áyayta acu chícáro. ¹¹Asan ba quin be rácatro. Ba quin bicayat as cuitar cham cuáquira Sirat ba quin urá wícataro. Etar ba quin be rácatro. Ba urán cuít rehcayta acu be rácatro. ¹²Ba quin bicayat, baat cat, aját cat Sir chihtá cajac ojcor rahra rahra tan wan tew̃átaro. Ba cat as cat ohbac tew̃ín acu be rácatro.

¹³Rábinu, asan erar ba quin be racar chihtá baat istayta acu ehcuro. As búcoyan, búcoyan ba quin ben seh̃wac cuar áhajira bitách béjetro. Ba quin etar ehcuro. Aját ehcwayat judío bár binat Sir tamo sihw̃ay yinjacro. Etar ba cahujinat cat Sir tamo síhw̃ayta acu ba quino be rácatro. ¹⁴Sirat ey chihtá ehcún wajacro. Bahnaquin quin ehcún wajacro. Eyta cuácayat aját griégoin quino cat, griego cuw tew̃ti bin quino cat, urá cuít bin quino cat, urá conu bin quino cat ehcwata biro. ¹⁵Eyta chihtara ba Roma bin quino catum aját chihtá ey ehcwá rácatro.

El poder del evangelio

¹⁶Jesucristo chihtá aját uw cahmar rooti ehcuro. Chihtá eyan Sir imáy quéneyro. Bíyinatán chihtá ey cácyatan Sirat eyin bahnaquin síwayqueyra. Judío fintara, judío bár bíntara, bíyinat cácyatan, eyin síwayqueyra. ¹⁷Ey chihtá cuitaran isat uch itro. Bitara cuácayat Sirat uw cuitar tayar bár cháctara, isat ey itro. Jesucristo chihtá im eya rahcuír yajcáyatan Sir owár tan wan chácáro. Sir carit úchicri bi cuitar im eyta wac bahjacro. “Bíyinatán Sir chihtá caquir car tayar bár waacáyatan, cuacúr Sir im owár ítayqueyra,” wacaro. Eyta étara chihtá eyan rooti ehcuro.

La culpa de la humanidad

¹⁸Uwat Sir tamo síhw̃atiro. Sir tayar yajcaro. Sir tayar yajquíc rehquí, chihtá uní eyra istiti rehcaro. Eyinat tayar yajquíc rehquí Sir chihtá ráhctiro. Cahujín quino cat rahcua áytiro. Eyta cuácayat Sir cuacúr binat ey ques técuaro. Uw acu ima turir car cuécuro. ¹⁹Uch síhw̃awi: Récaji Sirat iman bitáratara ehcú bahjáquinro. Eyta ehcuajác etar uwat Siran bitáratara caba istátaro. ²⁰Récaram cabar cuanír cuitar ah acat tas Sira bitáratara ey istata rehjecro. Ub cuitar Sitra uchta istá báreyra. Cuat cajcan, ican, rihan, bówaran, ruwan raban bita chájectara ey istír car síhw̃ataro. Sirat ey bahnác chajac étarwan ajcan urán cuítro. Siran quéneyro, síhw̃ataro. Sirat eyta chajac étara uwat “Aját istiti rehquí tayar yajacro,” bitách wácajatro. “As aje táyari batro,” bitách wácajatro. ²¹Uwat Sirat chájaquey it cuar, Sir tamo síhw̃atiro. Ey quino “oquéy, as obir yajacro,” wátiro. Cuat imár ur icar cuayar síhw̃ajacro. Imár bow̃ ca téjecro. Ay séhw̃ati rehjecro. ²²Eyinat imár ojcor, “urán tahnác,” waquíc cuar, cuayir rehjecro. ²³Sir queney tamora, yárajár ey tamora síhw̃ati cuar, sirir órojoquey tamo sihw̃ay yinjacro. Uwir órojoc tamo, ruwásiran wan órojoc tamo, ruwan wan órojoc tamo, ricumán wan órojoc tamo sihw̃ay yinjacro. “Sir quéneyro,” sihw̃ay yinjacro.

²⁴Eyta chíhtara Sirat eyin ria bár etí téjebro. Eyin quin “tayar yajti jawĩ,” waquíc etchacro. “Rahra rahra isár yajti jawĩ,” waquíc etchacro. Imár urá cut ay bár yajcayta acu etí téjebro. Uw imár urá cut rahra, rahra isár yajcayta acu ria bár etí téjebro. ²⁵Uwat Sir chihtá uní ey tehmojocro. Tehmár car chihtá uní bár ey rahjacro. Cajcan teyan chájaquib tamo síhḡatiro. Cuat caje cutara, ica cutar chájaquey tamo síhḡajacro. Cajcan teyan chájaquib ojcor etiti ay tew̄ata bin cuar ey tamo síhḡatiro.

²⁶Eyta chíhtara Sirat eyin quin “cahujín besir yajti jawĩ,” waquíc bar etchacro. Isaran tahnác rehquít wiw̄ín serin owár questa camic bar tehmojocro. Tehmár wiw̄ín imár wiw̄ín owár questa camay yinjacro. ²⁷Eta jaw̄ serin wiw̄ín owár camic cat bar tehmojocro. Tehmár sérinan imár serin owár isár yajca racar isóy yinjacro. Isár yajca racar rehcatat imár serin owár questa camay yinjacro. Eyta cuácayat eyta tayar yajcayat imár sibár cat, urá cat bahnác ruhḡujacro. Tayar yajác ques ruhḡujacro.

²⁸Uw éyinat Sir ajcá bár chajac etar, Sirat rahra cat eyin ajcá bár chájacro. Imár chihtá cut ur ay bár yajcayat súti chájacro. ²⁹Eyta chácayat éyinat uw besir yajquíc cat etítiro. Bitara útura urá ay bár yajquíc cat etítiro. Cajcan oyan imár ístiray chaca racar isóc cat etítiro. Cuayin urir síhḡaro. Es cat abáy binro. Uw cat yaúquinro. Tecuas cat to binro. Cahujín cayar cat yájquinro. Urá cat ahsín binro. Uw cat ríoquinro. ³⁰Cahujín cahm icar sucuar cat tew̄quinro. Sir cat quehsí binro. Eyinat carin quin ajcai bár cat tew̄quinro. Imaran bahnaquin cuitar cat síhḡaro. Imaran bahnaquin cuitar síhḡar cat tew̄quinro. Imár chíhtá cuitar ur ay bár yajquín cat síhḡaquinro. Tetín abín cat ajcá bár béquinro. ³¹Cuayir cat síhḡaquinro. Urá bucáy cat síhḡaquinro. Imarat yajquín wajác éytara cat yajti binro. Uw cat sehnác bár binro. Uw tamo cat síhḡati ruhḡúquinro. ³²Bíyinatán eyta yajcáyatan, Sirat sutáyqueyra. Sirat eyta sutín wac bahjacro. Eyta wac bahjacan éyinat itro. Eyinat sutata it cuaquir, im eyta etiti yajcaro. Acsar cat cahujinat cat eyta yajcayat, caba yajc síhḡaro.

Dios juzga conforme a la verdad

2 ¹Uwinu, ¿baat bitara rehquít cahujín cahm icar tew̄qui? Baat bi tayar yajác ques tew̄ ic cuaquir, behmarat cat im eyta yajcaro. Cahujín ojcor eyta tew̄a rabar, behmár cahm icar chí tew̄o. ²Eyta yajca rabar tew̄ íctara is bahnáquinat ítitan, Sirat yarsa cuécwataro. Yarsa ruhḡ átaro. ³Baatán cahujinat ur ay bár yajác cahmí icar tew̄ íc cuar, baat cat im eyta ur ay bár yajcaro. ¿Eyta yajca rabar Sirat ba cuécwajar síhḡaqui? ¿Ba tanra eyta síhḡaqui? ¿Eyta síhḡa rabar eyta yajqui? ⁴Sirat ba ac ay yajquíc cuar, ¿baatrá eyta yajquíc tamo síhḡatiqui? Baat Sir tayar yajác ques Sirat cuécuti cuar ay yajcaro. Turti cuar obir yajcaro. Sirat eyta yajquíc cuaquir, ¿baat acsar ur ay baran echí yajquín síhḡaqui? ¿Baat tanra eyta síhḡaqui? Sirat récaji cuécuti rehcaro, ba ur ay bár yajquíc etayta acu. ⁵Eyta cuar ba urá tehmotiro. Sir chíhtá rahcti yajca rabar acsar acsar ur ay baran echí yajcaro. Eyta yajcayat Sir tec chícaro. Bíyinatán it cuar acsar ur ay bár yajcáyatan,

cuecuc cab cucayat, Sirat éyinan cuít cuécwayqueyra. Cuecuc cab cucayat acat Sir imat uw bahnaquin quin ur ay bár yajác ques cuecun acu waquíur chájacro.

⁶Uwat bitara yajáctara, Sirat itro. Etar ay yajáctara, obir yajcáyqueyra. Cuat ay bár yajáctara, cuécwayqueyra. ⁷Cahujinat sihw̄at, “Sirat asan im owár cara yehn áyata” síhw̄aro. “Sirat asan im owár itay beyata” síhw̄aro. “Cuacúr bur cut suw cut asan itay beyata,” síhw̄aro. Uw éyinat ur ay yajca rabar eyta síhw̄aro. Bíyinat ur ay yajca rabar eyta síhw̄ayatan, Sir ima owár cuacúr itay beyáyqueyra. ⁸Cuatán cahujinat imár támoa síhw̄aro. Eyta sihw̄ar étarwan Sir chih̄tá yajti ruh̄w̄uro. Yajti cuat ur ay bár etiti yajcaro. Bíyinat eyta yajcayat, Sirat eyin cuécwayqueyra. Eyin ruh̄w̄áyqueyra. ⁹Bíyinat urá ay bár yajcayat, eyin abáy ruh̄w̄áyqueyra. Abáy cuécwayqueyra. Judíoín cat, judío bár bin cat im eyta cuécwayqueyra. ¹⁰Cuatán bíyinat ur ay yajcáyatan, éyinan ohbac itayqueyra. Sirat eyin im owár carin yin áyayqueyra. Eyin ajcá ji chácayqueyra. Judíoín cat, judío bár bin cat eyta chácayqueyra. ¹¹Ucha síhw̄awi. Sirat urá istanácuítar judíoín cat, judío bár bin cat im eyta cuécuro. Obir yajquíc cat urá istanácuítar im eyta obir yajcaro.

¹²Cahujín quin bachan chih̄tán ehcuti cuácayat, Sir tayar yajcaro. Eyinat bachan chih̄tán istiti rabar Sir tayar yajquíc etar cab oc icar téyqueyra. Cuatán biyin quínoan bachan chih̄tán ehcwayat, cati cuácayatan, eyin cat cab oc icar téyqueyra. Ehcuti tacat ehcuíac tacat, cati cuácayat cab oc icar téyqueyra. ¹³Uch síhw̄awi. Bachan chih̄tán cucajá cuitar rahcuí tecut Sir ub cahmor urá ay waájatro. Cuatán Sir ub cahmor ay waanra, ey chih̄tá caba yajcáyatan Sir ub cahmor ay waátaro. ¹⁴Eyta cuácayat judío bár bin tamo síhw̄awi. Eyin quin bachan chih̄tán siw̄ti yajcaro. Eyta cuar isat ítitan, judío bár binat imár urá cut ur ay bár yajquíc itro. Bachan chih̄tán eyin quin siw̄ti cuaquir Moisesat yajác eyta yajcaro. ¹⁵Eyta yajc étarwan imár urá cut bitar yajcata bíntara ey itro. Ey urá sihw̄at, imarat ur ay bár yajác tamo sihw̄at, Sir táyatro. Imarat ur ay yajác tamo sihw̄at cat tayar bár síhw̄aro. Eyinat imár urá cutar itro. ¹⁶Aját bahnaquin quin chih̄tá uch ehcuro. Cábara tinyat acat Jesucristo ajc cut Sirat uw urá istáyqueyra. Eyta istír uwat urá cut bitara síhw̄ajactara bahnác istáyqueyra. Eyta istír ur ay bár bin cab oc icar téyqueyra.

Los judíos y la ley de Moisés

¹⁷Ba cahujinat imár ójcoran wacaro: “Asan judío uwro,” wacaro. Ba eyta wáqueyinat bachan chih̄tán abir cuít Sir sasá yinjác síhw̄aro. Cahujín quino “asra Sir sasaro,” wacaro, baat cahujín quino. ¹⁸Ba eyta wáqueyinat bachan chih̄tán abjacro. Abjac rehquít, Sir chih̄tá caba yajquíc síhw̄aro. Biyan ay bártara, biyan áytara, yarsa istíc síhw̄aro. ¹⁹Ba tan sihw̄at, uwa istiti bin quin baat yarsa ehcúc síhw̄aro. Chih̄tá sinti bin quin baatán yarsa siw̄ic síhw̄aro. ²⁰Sasá quin chih̄tá yarsa ehcúc síhw̄aro. Cuayir yajquín quin ay yajc ayic síhw̄aro. Baatán uw eyta siw̄ic síhw̄aro. Bachan chih̄tán abir cuitar urán cuít rehquíc síhw̄aro. Bahnác caba yajquíc síhw̄aro. Ba urá eyta síhw̄aro. ²¹Ba judío binat cahujín

siw̄ro. Eyta siw̄ ic cuaquir, ¿bitara rehquít behmát sántica? Uw quino “bes yajti jaw̄i” wacaro. Eyta waquíc cuaquir, ¿bitar rehquít bes yajca? ²²Bah judío binat uw quino wacaro: “Cahujín wiya besir yajti jaw̄i,” wacaro. Eyta waquíc cuaquir, ¿bitara rehquít uw wiya besir yajca? Baatán sirir órojoquey tamo, “restán abáy” sihw̄ar quehsuro. Eyta sehw̄ac cuaquir, ¿bitara rehquít ey ohnor bes yajca? ²³Baat behmár ojcor wacaro: “Isat bachan chih tán caba cájacro,” wacaro, behmár ojcor. Eyta cajac waquíc cuaquir, ¿bitara rehquít ey yajti auca? Eyta yajti cuácayat Sir ima ajcá bár bécaro. ²⁴Baat eyta yajc ojcor Sir carit cuitar úchicri wac bahjacro: “Ba oquís judío bár binat Sir ojcor ahsín tew̄ro.” Sir carit cuitar eyta wac bahjacro.

²⁵Ba judío in umá cuicaro. Umá cuiquír car Moisés bachan chih tán cácyatan, ayro. Cuatán bachan chih tán cati ruhwayat, umá cuayar cuicaro. Bah umá cuiti binan wanro. Bah Sir sasá batro, bachan chih tán cati cuácayat. ²⁶Etarwan umá cuiti bínatra Moisés bachan chih tán yajcáyatan, Sirat eyin itit, umá cuijaquin urán wanro. Sirat eyin itit, ima sasaro. Umá cuiti cuar, umá cuijáquinan wanro. ²⁷Umá cuiti binat bachan chih tán yajquíc etar ba judío in cahm icar tew̄ átaró. Baat bachan chih tán sinjac cuar baat éytara yájtiro. Umá cuijác cuar éytara yájtiro. Eyta yajti ques judío bár binat bah cahmí icar tew̄ átaró. ²⁸Judío quéneyin úchtaro. Judío quéneyin ojcor wacayat ojc ey ojcori wátiro. Umá cuijác ojcori wátiro. ²⁹Cuatán ur ojcor wacaro. Urá cutar judío quéneyin rehcata binro. Bíyinatán ur ay bár yajquíc etí técyatan, éyinan Sir sasá quéneyro. Imár urá cuitar Sir ima tamo sihw̄ayat, judío quéneyin rehcatáro. Cuatán chih tá cuihsujaquey abyat, cabach batro. Biyin urá cutar judío quéneyin rehca yat, Sirat eyin ojcor ay tew̄ áyqueyra. Uwat eyin ojcor ay tew̄ ti tacat, Sirat ay tew̄ áyqueyra.

3 ¹Eyta wacayat, uw tan sihw̄at, judío in ojcor uch sihw̄ata óraro: “Sirat judío in acu cat judío bár bin acu cat ayan owara yajacro,” sihw̄ata óraro. “Judío in ac ayan cui tra yájtiro,” sihw̄ata óraro, uw tan sihw̄atra. “Uwat umá cuiquíc tacat, Sir eyin acura ayan cui tra yájtiro,” sihw̄ata óraro, uw tan sihw̄atra. ²Eyta sihw̄ac cuar eyta cat batro. Uch sihw̄awi. Sirat judío in ay obir yajacro. Sirat eyin ac ayan cuít yajacro. Récaji ima chih tá eyin quin ehcu jacro. Tehmóti sihwayta acu ehcu jacro. ³Eyta ehcu jác cuar judío cahujinat ey chih tá sihw̄ati wácajacro. Judío eyin ey chih tá wácajac cuar, Sitra tehmoti rehjecro. ⁴Aját ba quin uní wacaro. Sir imát wac bahjác ey teh mó báreyra. Uw bahnáquinat sucuar tew̄ ic tacat, Síratra urá istaná cuitar uní wacaro. Sir quin wájác Sir carit cuitar Davidat uchta cuihsú bahjacro:

Bahnáquinat itit, bahat uní wacaro. Bahnáquinat bah urá wahítitan, bah tayar batro, cuihsú bahjacro, Sir ojcor.

⁵Cahujín tan sihw̄at uchta sihw̄aro. Isat ur ay bár yajcayat, uwat Sir tamo Siran ayan cuít sihw̄aro. Siran ur ayan uw tahnác sihw̄ata sihw̄aro. Etarwan ur ay bár yajác ques Sirat cuécwajar bin cuecuc sihw̄aro. Aját uw tan sihw̄ac ojcor wacaro. ⁶Uwat eyta sihw̄a cuar, eyta cat batro. Sirat isat tayar yajác ques cuécutira yájcayat. Cuécwajar rehquír waquít, uw bahnaquin tayar yajác ques cuécwajat. ⁷Cahujín tan sihw̄at, imarat sucuar tew̄yat, uwat ítitan, Siran

ayan cuitro. Sirat sucuar téw̄tiro. Eyta tew̄ti rehquít ur ayan uwa cuitro. Eyin tan sihw̄at imár chihtá cuít uwat Sir tamo ay sihw̄ac etar imarat sucuar tew̄ jác ques Sirat cuécwajar síhw̄aro. Eyta sihw̄a cuar éyinat cuayir síhw̄aro. ⁸Eyin tan sihw̄at, éyinat ur ay bár yajcata binro. Eytair báreyra ur ay bár yájtieyra uwat Sir tamo síhw̄ati chácata síhw̄aro. Uw imár tan sihw̄ar eyta tew̄ro. Cahujinat waquít, aját eyta wac bahjác wacaro. Eyinat eyta waquíc cuar, tew̄yat sinro. Ajatrá éytara wátiro. Eyta waquíc ques, Sirat eyin cuécwayqueyra.

Todos somos culpables

⁹Sirat judfoin at icar ima chihtá wijac étarwan Sir ub cahmor urá ay waajacra, síhw̄ati jaw̄i. Sir tayar batra, síhw̄ati jaw̄i. Aját récaji ba quin wajacro. Bahnaquin Sir tayar yajác, wajacro. Judfoinat cat, judfo bár binat cat Sir tayar yajác wajacro. ¹⁰Sir carit cuitar ey ojcor wacaro:

Istiyati Sir ub cahmor ur ay bár yajti ita báreyra. Ubistiri batro. ¹¹Ur ay yajquíc cat úbistiyati sítiro. Bahnáquinat Sir chihtá yaj cun batro. ¹²Bahnáquinat Sir chihtá yajti wácajacro. Cuis istiyati ur ay yajti bahnáquinat Sir tayar yajcaro. Istiyati ur ay yájtiro. Cuis istanati yájtiro. ¹³Eyin téw̄queyan chein soncuar sícara restá waar éytaan wanro. Eyin cuw cutar uw cayar yajcaro. Eyinat téw̄queyan cumoroát cohr yar éytaro. ¹⁴Eyinat ajc ahsín tew̄ro. Téw̄ajar bin tew̄ro. ¹⁵Eyinat uwa yauwa rácatro. ¹⁶Uw ruhw̄uro. Uw cuécuro. Eyinat uw ríoro. ¹⁷Eyinan ohbac ítajatro. Tecuas yajquíc báhntiro. ¹⁸Eyinan Sir ub cahmor ayú batro. Sir ajcá bár bécaro.

Sir carit cuitar eyta wac bahjacro. ¹⁹Isat itit, bachan chihtán judfoin acu wac bahjacro. Moisesat icúr wac bahjacan, éyinat rahcuayta acu wac bahjacro. Uw bahnaquin ajc sácayta acu eyta wac bahjacro. Cajc bahnác cutar uw bahnáquinat imarat Sir tayar yajác ey istayta acu eyta wac bahjacro. ²⁰Eyta chíhtara bachan chihtán sinir car uwat imár oquís tayar yajác istáyqueyra. Bachan chihtán yajquír cuitara Sir ub cahmor táyari bár waájatro.

La salvación es por medio de la fe

²¹Uw bahnaquin urá eyta cuácayat chihtá istiy bar ehcuajacro, Sir tayar bár chácayta acu. Moisesat bachan chihtán récaji ehcuajacro. Cuatán Sir tayar bár chaquic chihtá ajquiro. Ajquír cuar, Moisesat cat, úchicri Sir chihtá ehcúquinat cat im ey ojcor cat ehcuajacro. ²²Chihtán úchtaro: Jesucristo chihtá caquir car Sir ub cahmor tayar bár waátaro. Bíyinatán “Jesucrístoat as síwata,” sihw̄ar ey chihtá cácyatan, éyinan tayar bár chácayqueyra. Judfoin cat, judfo bár bin cat imár owara tayar bár chácayqueyra. ²³Owara binat Sir ub cahmor ur ay bár rehjecro. Etarwan Sir owár itay béyajar rehjéquinro. ²⁴Eyta béyajar tacat Sirat eyin racar rehquít eyin acu tayar bár chácuro. Sehnác rehquít eyta chácuro. Jesucrístoat éyinat ur ay bár tayar yajác tunjac chihtá cuitar Sirat sicor tayar bár chácuro. ²⁵Síratán Jesucrístoan uwat tayar yajác ques tunin acu chinín waquír

chájacro. Jesucristo ab cuitar tunin waquíř chájacro. Etar uwat Jesucristo chihtá cácaýat, Sir ub cahmor tayar bár chácaro. Sirat récaji uwat tayar yajác ques cuécuti etchacro. Uwat tayar yajác Sirat itchacro. It cuaquir istiti bin eyta cuécuti yajacro. Eyta cuácaýat Sir imát caba yajác ehcún acu Jesucristo uw cuitar tunin waquíř chájacro. Uw cuitar chinín waquíř chájacro. ²⁶Cuat ah rícaro Sirat ima urá istanáć cuitar yarsa yajcaro. Bíýinat Jesucristo chihtá cácaýat Sirat tayar bár chácaro. Jesucristo chihtá cuitar tayar bár chácata bi chácaro.

²⁷Eyta cuácaýat isat ijmár ojcor, “ayan bahnaquin cuitatro,” waquíř etátaro. Cahujín quin eyta waquíř etátaro. Isat Sir ub cahmor ay waan acura bachan chihtán yajquíř cat caba yájcaýatro. Eyta cuar Jesucristo ajc rahcuír cuitar Sir ub cahmor ay waátaro. Eyta bira isat ijmár ojcor ayan cuít tew̃ic ey etátaro. ²⁸Is bahnáquinat ítitan, uwat bachan chihtán yajquíř cuitar Sir ub cahmor ay waáýatro. Cuat Jesucristo chihtá rahcuír cuitatrun ur ay waacaro. Eyta bira isat ijmár ojcor ayan cuít tew̃ic etátaro. ²⁹Chihtá cuayar bi síhw̃ati jaw̃i. Sirat cajc uch cutar uw istir bini obir yáýtiro. Judíoín istir bini obir yáýtiro. Judío bár bin cat obir yajcaro. ³⁰Sitra istanacro. Istirum batro. Eyta cuácaýat isat itit, judíoín tacat, judío bár bin tacat Sir imát bahnaquin obir yajcaro. Etarwan bíýinatan Jesucristo chihtá ráhcyatan, Sirat eyin ítitan, tayar batro. Judíoín tacat, judío bár bin tacat eyta ráhcyatan, Sirat tayar bár chácaro. Eyta cuácaýat is judíoínat ijmár ojcor “ayan bahnaquin cuitatro,” wácaýatro. ³¹Isat Jesucristo chihtá cajac cuar bachan chihtán ajcá bár yehw̃ tétiro. Cuatán Jesucristo chihtá caquir cuitar isat waquíř, bachan chihtán caba ehcuýacro.

El ejemplo de Abraham

4 ¹Acsar uch síhw̃awi, Abraham tamo, is cohtín tamo. Abraham eyat ima sibirá sicar bin acsar acsar isan ima bomcar cohná bahjacro. ²Abrahamat ima chihtá cuitatra ur ay yajaquir waquíř, ima urá cutra Sir ub cahmar tayar bár chájaquir waquíř, im ojcor “as ayan bahnaquin cuitatro,” wacata binro. Eyta cuara Sir ub cahmotra eyta bitách wácaýatro. Etarwan tayar bár chájaquey, ima urá cuitari cháýtiro. ³Sir carit úchicri wac bahjác cuitar Abraham ojcor wacaro.

Abrahamat Sir chihtá uní quen rahjacro. Eyta rahjác etar Sirat ey ítitan, tayar batro.

⁴Uch cat síhw̃awi. Uwat canar ruoyat ray tunro. Ray eyan rácarí wítiro. Canar yajquíř tayar tunro. Eytaan wan uw ima urá cuitatra Sirat yajc ayquey caba yajcátair waquíř, Sirat eyin túnata binro. Eyta yajcátair waquíř, Sirat wíqueyan rácarí witi rehcata binro. Tayar etar wícata binro, ey yajcátair waquíř. ⁵Eyta cuar bíýinat imár urá cuitatra Sirat yajc ayquey caba yajti cuaquir, Sir chihtá rahcyat Sirat eyin acu tayar bár chácaro. Sir ima chihtá bahnác yajti cuaquir, Sirat sehnác rehquíř ima ub cahmar éýinan tayar bár chácaro. Imár tan síhw̃at, Sirat síwata síhw̃ac etar tayar bár chácaro. ⁶Uchicri Israelin cara Davidat cat ey ojcor tew̃jacro. Uwat ima urá cuitar bachan chihtán yajti tacat,

ey chihotá yajti cuaquir Sirat tayar bár chácáro, wacayat, ey ojcor tew̄ jacro, Davidat. Uw eyan ohbac waquín ac Davidat uchta cuihsú bahjacro:

⁷ Biyat tayar yajacan Sirat sicor tayar bár chácayatan, ey uwan óhbachro.

Biyat tayar yajacan Sirat tayar bár jácayatan, eyan óhbachro. ⁸ Bi quínoan Sirat “bahra tayar batro,” wacáyatan eyan ahniro.

⁹ Davidat judfoin umá cuijác bin istir ójcori wátiro. Acsar umá cuiti bin ojcor cat judfo bár bin ojcor cat wacaro. Isat waquí, Abrahamat Sir chihotá rahjác etar Sirat tayar bár chájacro. ¹⁰ Anto umá cuiti cuácayat, tayar bár chájacro. Etar ey yahncút umá cuijacro. Umá cuijác étari Sir ub cahmar tayar bár chátiro. ¹¹ Sirat Abraham quin umá cuic áyjacro. Abrahamat, Sir chihotá cajac ehcún acu Sirat ey quin umá cuic áyjacro. Cajac etar Sirat tayar bár chajac ehcún acu umá eyta cuic áyjacro. Anto umá cuiti cuat, Sir chihotá cácyat Sir ub cahmar tayar bár chájacro. Etarwan uwa umá cuiti cuaquir, Sir chihotá cácyatan, Sirat tayar bár chácáro. Sirat ima chihotá ráhcuiquin acu umá cuiti bin tacat, umá cuijác bin tacat, judfo bár bin tacat, judfoin tacat, Abrahaman eyin ac tetír cohtír chaquin ac eyta yajacro. ¹² Abrahama tetír cohtír umá cuiti bin istir acui batro. Umá cuijác bin acu cat cohtaró. Umá cuiquí cat Sir chihotá ráhcuiquin acu cat cohtaró. Abrahamat Sir chihotá rahcuír ria caquir eyta, bíyinatán Sir chihotá eyta cácyatan, eyin ácuán cohtaró.

La promesa es cumplida por medio de la fe

¹³ Sirat Abraham quin ey bómcarin quin cajc wiquin wac bahjacro. Eyta cuar Abrahamat bachan chihótán yajác étari wiquin wátiro. Abrahamat Sirat wajaquey uní séhw̄ajac etar wiquin wac bahjacro. Abrahamat eyta séhw̄ajac etar Sirat im ub cahmar tayar bár chájacro. ¹⁴ Uch síhw̄awi. Síratán récaji cajcan racar wiquin wajacro. Eyta chihótara bachan chihótán yajquíc tehmar cajc wiquir waquí, Sirat racar wiquin icúr acui wácajar binro. Uwat Sirat wajaquey bitani uní síhw̄ajar binro, eyta yajquíc tehmar wiquir waquí. ¹⁵ Cuatán bachan chihótán sinic cuar, ey bach auyata, cuít cuécwayqueyra. Eyta cuar bach bár cuácayat, bi aúwajatro.

¹⁶ Etarwan Sirat tew̄ jaquey tamo uní quen síhw̄ac etar Sirat racar wícajqueyra. Imát wiquin wac bahjacan racar wícajqueyra. Sirat Abraham bomcarin bahnaquin acu eyta tehmoti wiquin wac bahjacro. Bíyinat bachan chihótán cuitar Sir chihotá uní síhw̄ayatan, eyin acu cat wiquin wac bahjacro. Acsar cat bíyinat Abrahamat Sir chihotá uní sehwar eyta síhw̄ayatan, eyin acu cat wiquin wac bahjacro. Bíyinatán eyta Sir chihotá uní síhw̄ayatan eyin ácuán, is bahnaquin ácuán Abrahaman cohtaró. ¹⁷ Sirat carit cuitar Abraham ojcor wajacro: “Bahan aját uw ajquí bin acu, ajquí bin acu, uw bahnaquin acu cohtá chájacro.” Etar Sir ub cahmar Abraham is cohtaró. Sir tamo Abrahamat séhw̄ajacro. Síratán sácajaquin sicor estají yin áyquibro. Eyat icúr bi bár sícara bin icúr bi yajcero.

¹⁸ Sirat Abraham quin récaji wajacro: “Ba bomcar cuacúr abá sar ub ric eyta cháquinro,” wajacro. Abrahamat itit, iman werjayán tahnác

chinro. Etar sasá cóhnajar séhŵajacro. Eyta cuar Sirat wajaquey tamo uní séhŵajacro. “Iman uw ajquír bin acu, ajquír bin acu, uw bahnaquin acu Sir chihtá cuitar cohtá chácata,” séhŵajacro, Abrahamat. ¹⁹Abrahamat sasá cohn cat ima sibirá ítitan, chéinan wanro. Bara ciencuano. Ima wiya Sáraat cat sasá cohn cat chaucan tahnacro. Eyta cuar, Sir chihtá tamo uní quen séhŵajacro. ²⁰“Sirat wac bahjacan, eyat wácatiro. Sirat as cayar yájtiro,” séhŵajacro. Cuatán Sir tamora cuít séhŵajacro. Sehŵa rabar Sir ojcor ay tew̄jacro. “Sirat uní tew̄ic” séhŵajacro. ²¹“Sir imát yajquín wac bahjacan Sirat caba yajcata,” séhŵajacro. Chiht istiy séhŵati im ey ojcor séhŵajacro. ²²Eyat Sir tamo eyta séhŵayat, Sir tayar yajác tayar bár chájacro.

²³“Tayar bár” wacayat, ey istir bin cuitari waquín ac cuihsútiro. ²⁴Sirat ey cuitar chi, is cuitar chi waquín acu eyta cuihsujacro. Is tac icar bin bíyinatán Sir chihtá tamo uní quen síhŵayat eyin cuitar cat wacáyqueyra. Sir im eyat is Cara Jesucrísticoan sácajaquin tac ícara bin sicor yehn áyjacro. ²⁵Jesucrísticoan isat tayar yajác tunin ac yaujacro. Etar isan Sir ub cahmor tayar bár chaquin acu sicor estají yehnjacro.

El resultado de ser aceptados como justos

5 ¹Isat Sir chihtá rahcyat isan tayar bár chájacro. Eyta chajac etar Sir jor ténajacro. Jesucristo chihtá cuitar ohbac ténajacro. ²Jesucristo chihtá isat rahjác etar isat tayar yajác tayar bár chájacro. Eyta chácayat ey chihtá cuitar is ohbac itro. Ahra ohbac cuácayat, yahncutra Sirat is quin ima jor carin yin áyayqueyra. Eyta yinic acor isan ahní itro. ³Acsar cat is ruhŵuyat isan ahní itro. Isat ítitan, uwat is ruhŵuyat isat Sir chihtá wácati itin ac cuít sinro. ⁴Etar wácati ityat, Sirat is ítitan, urá tehmótiro. Is urá tehmoti rehquít isan ey jor beyin acor itro. ⁵Etar isat ítitan, eyat is cayar yajti uní beyáyqueyra. Sirat ima Ajcan Cámuran Ey is ur icar wícaro. Eyta wícat, eyat is siŵro. Eyta siŵyat, isat ítitan, Sirat is sehnacan cuitro. Etarwan is cayar yajti beyáyqueyra.

⁶Récajian ijmár chihtá cuitar isat tayar yajác bitách túnajar rehjecro. Ijmár urá cut bitách túnajatro. Eyta cuaquir caba cucayat, Jesucristoat isat tayar yajác tunin chinjacro. Isat Sir tamo síhŵati cuar is cuitar tayar tunin chinjacro. ⁷Uch síhŵawi: Ur istán bin ser istiyát siwin yehnyat, cahujinat síuquib yauwin ahnwata óraro. Eyta ahnwayat ur istán bin síuti waca teta óraro. Cuatán uw ur ay binra siwin acu cahujinat wácati síwata óraro. Síuquib ima yauwata tacat, ur ay bi eyra síwata óraro. ⁸Cuatán isan ur ay bár tacat Jesucristoat is siwin acu ima chihtá cuitar chinjacro. Etarwan Sirat is sehnacan toro.

⁹Jesucristoat isat tayar yajác tunin acu chinjacro. Eyta yajác etar isat itit, ey chihtá cuitar Sirat cuecuc cahmar is síwayqueyra. ¹⁰Isa Sira ac quehsí bin cuar, Sir wacját sicor tena áyjacro. Eya chinír cuitar is quin iwō áyjacro. Etarwan sicor yehnác rehquít is bar síwayqueyra. ¹¹Eyta cuácayat isan Jesucristo chihtá cuitar Sir ac ahní rehcaro. Jesucristo is quin iwō ayir cat ahní rehcaro.

Adán y Cristo

¹²Eyta cuácayat uch síhw̄awi: caje uch cutar récaji cuis istir biyat tayar yajacro. Adanat tayar yajacro. Eyat tayar yajác rehquít yarjacro. Etar ey yarir eyta bahnáquinan im eyta sácáro. Bahnáquinat ur ay bár yajác rehquít sácáro. ¹³Anto Moisesat bachan chihtán ehcuti cuat echí, uwat ur ay bár yajacro. Cuat uwat ítitan, bachan chihtán bár cuácayat, bi auquir báreyra, bi quesí cuécwajatro. ¹⁴Bi ques cuécwajar cuar, bahnaquin sácajacro. Adán itchac cab acat cuar Moisés itchac cab acat tas, biyin yinjáctara bahnaquin sácajacro. Adanat Sir imát wajác ria cati ruhw̄ujác rehquít yarjacro. Eyta cuar cahujinat tayar ajquír bi yajác cuar, ey ques sácajacro.

Adán chihtá cuitar bahnaquin tayar ji chaquir eyta, Jesucristo yehnata bi chihtá cuitar cat uw bahnaquin tayar bár chácata chájacro. ¹⁵Cuat Adanat tayar yajaquey cat ajquítro. Yahncút bi Jesucrístoat yajaquey cat ajquítro. Adán istir biyat tayar yajác etar ricán to bin sácajacro. Cuat Jesucrístoat yajquíc eyrun Adanat yajaquey cuitro. Ey istir biyat ricán to binat tayar yajác sicor tayar bár chájacro. Sirat uw sehnác rehquít eyta chájacro. ¹⁶Sirat uw acu yajquey cat ajquítro. Cuis istán biyat tayar yajaquey cat ajquítro. Táyanan icar istán yajcayat ques, Sirat uw bahnaquin sac áyjacro. Cuat tayar bucoy bucoy yajquíc cuaquir, Sirat ima chihtá wíjacro. Ey chihtá cuitar sicor tayar bár chájacro. ¹⁷Récaji ser istán biyat tayar yajacro. Adanat tayar yajacro. Eyta tayar yajác etar uw bahnaquin sácáro. Eyta cuar Sirat yájquiqueyra Adanat yajaquey cuitro. Sirat biyin sehnác etar racar obir yajcayat, éyinan ser istán ey chihtá cuitar, Jesucristo chihtá cuitar Sir jor cuacúr ítayqueyra. Eyinat tayar yajác tayar bár chácayatan, Sir jor ítayqueyra.

¹⁸Táyanan icar istán Adanat yajcayat, bahnaquin ur ay bár rehjecro. Ur ay bár rehccayat bahnaquin sácata waquír chájacro. Cuatán chihtá ay biyan icar istán Jesucrístoat yajác cuitar uw bahnaquin tayar bár chácataro. Eyta chácayat cuacúr Sir jor ítataro. ¹⁹Ser istán bi Adanat Sir ria cati ruhw̄ujác etar bahnáquinan urá ay bár rehjecro. Im eyta cat ser istán bi Jesucrístoat Sir chihtá caba yajác etar, ricán to binan tayar bár chácayqueyra.

²⁰Adán chihtá cuitar bahnaquin tayar ji waacayat, ítchareht yájcajareht bachan chihtán wíjacro. Uw imarat urá ay bár yajác chihtá cuít istayta acu wíjacro. Ey chihtá cuitar uwat imarat tayar yajác chihtá cuít itro. Etar uwat imarat tayar yajác cuít ityat, Sirat cat eyin sehnacan cuít rehquít táyanan caban túnjacro. ²¹Récaji táyarat uwa sácata rehjecro. Cuatán ahra Sirat uw sehnacan cuít rehcaro. Eyta sehnác rehquít uw cuitar tayar bár chaquir cat, ohbac etiti it áyayqueyra. Is Cara Jesucristo chihtá cuitar eyta it áyayqueyra. Etarwan Sirat uw sehnacan cuít rehjecro.

Muertos respecto al pecado pero vivos en Cristo

6 ¹Sirat uw sehnacan cuitro. Sehnacan cuít etar cahujinat síhw̄ata óraro, “Isat tayar acsar acsar yajcayat, Sirat is sehnacan acsar umás cuít chácayqueyra,”

síhwata oraro. “Eyta bira Sirat is sehnacan acsar acsar umás cuít chácayta acu ur ay bár sinjac acsar etiti yajcátaro,” síhwata óraro. Cahujín tan síhwat éytaro. ²Eyta síhwac cuar eyta cat batro. Isat urá ay bár yajcata síhwac cuar isan sácajaquinan wanro. Sácajaquinat ur ay bár yajquíc etír eyta is catum éytaan wan chácataro. Eyta bira isat urá ay bár yajquíc etátaro. ³Baat sinjac ey bucoy síhwawi. Biyin Jesucristo ajc cut rih sar siwýatan ey owáraro. Jesucristo chinjác eyta is cat chinjacan wanro. ⁴Ey chinír ruhcuír eyta is cat éytaan wanro, ey ajc cut rih sar siwýatra. Jesucristo chein ruhcuír, sicor estají yehnjacro. Sir ima Tet ima urá cuít bi cuitar ey yehn áyjacro. Jesucristo sicor yehnár eyta is catum sicor yinjacan wanro, urá ay yajquín acu. Eyta bira isat ur ay bár yajquíc etátaro.

⁵Jesucristo chinír eyta is cat sácajaquinan wanro. Ey urán wan rehquín acu sácajaquinan wanro. Eyta cuácayat, ey urán wan rehquít, is cat sicor estají yinátaro. Ey yehnár eyta is cat sicor eyta yinátaro. ⁶Uch síhwawi. Isat récaji ur ay bár yajca racar rehquíc sicor bar etchacro. Jesucristo cárucuí icar quejéc etar isat ur ay bár yajca racar rehquíc etchacro. Isat ur ay bár yajti acu, ay bár yajca racar isoti acu eyta chinjacro. ⁷Biyin sácayatan, éyinatan acsar ur ay bár yajca báreyra. Eyta cuácayat is cat sácajacan wan chaquin acu, ur ay bár yajti acu, Jesucristo chinjacro.

⁸Isat síhwat, Jesucristo chinír eyta isan eyta sácajaquinan wan rehquít, isan Jesucristo urán wan chácayqueyra. ⁹Etar uch cat síhwawi. Jesucristo chinír sicor estají yehnjacro. Eya búcoyra yárajatro. Búcoyra chínajatro. Yarti estají ítayqueyra. ¹⁰Jesucristo chinjác ojcor wacayat, ey chinjác rehquít, isat tayar yajác bahnác túnjacro. Icar istán caba túnjacro. Etar ahra sicor yehnár Sir jor estají itro. ¹¹Eyta cuácayat baan uchta chawí. Baat ur ay bár yajc cun rehcayat, baan sácajaquin eyta chawí. Ur ay bár yajti acu eyta chawí. Cuatán Sir tamo síhwán acu estají bin ur eyta chawí, Jesucristo chihotá cuitar urán bowán cuít chawí.

¹²Ba sibár uchta anto yarti cuat, ba ur ay bár yajca racar rehcaro. Cuatán ur ay bár yajca racar rehe cuar bachuwi. ¹³Ba ur ay bár yajca racar awí rehe tacat, urá ay bár yajquíc sinti jawí. Cuat ba urá Sir icar chawí. Sirat ba sácajaquinir cuat sicor estají it áyjacro. Eyta cuácayat Sir chihotá yajquín acu ba urá ey icar chawí. Ba ajc chi sibár chi ey at icar wiwí, ur ay yajquíc sinin acu. ¹⁴Ba bachan chihotá cuitar ítitiro. Cuat Sirat ba racar rehcayat, ur ay yajcáyqueyra. Baat ur ay bár yajca racar rehti ac waquír chájacro. Eyta bira ur ay bár yajquíc sinti jawí.

No hay que seguir pecando

¹⁵Eyta wacayat, cahujinat síhwat, isat ur ay bár yajcayat bitarach batro. Bachan chihótán bar wácajacro, síhwáro. Sirat is racar obir yajác chihotá cuitar itro. Eyta bira isat ur ay bár yajcayat bitarach batro. Cahujín tanra eyta síhwáro. Eyta síhwac ey urá bár binat síhwár eyta síhwáro. ¹⁶Uch síhwawi. Ba bi chihotá cuitar ítictara, eyan ba cayibro. Ba ac patronro. Baat ur ay bár yajquíctara, Satanás ba cayibro.

Ba patronro. Eyta yajquíc rehquít bar sácayqueyra. Cuat Sir chihotá cuitar ítictara, tayar bár reháyqueyra. ¹⁷Récaji ba acu Satanás cayíb rehjec tacat, ahra Sir chihotá bar cájacro. Caquir urá istán cuitar yajcáy yinjacro. ¹⁸Ba ac Satanás cayíb rehjec tacat, bar síujacro. Síuyat ur ay yajca racar isóc rehquít eyta yajcáy ocujacro. Eyta cuácayát, aját Sir quin “oquéy” wacaro. ¹⁹Baat orac rahcuayta acu aját ba quin tewĩro. Eytair báreyra baat ráhcuajar óraro. Baat récaji it cuaquir ur ay bár bachuti yajacro. Eyta yajquír car Sir tayar acsar bucoy bucoy yajacro. Cuatán ahra ur istán cuitar ur ay yajquíc sinwi. Siran ba acu cayíb chaquin acu eyta sinwi.

²⁰Récaji ur ay bár icar ityat, behmár tanra ur ay yajc cun bár rehjecro. ²¹Ba ur ay bár ityat icúr acui batro. Ahra eyta yajác tamo sihw̄ar baan uw cahmar ehurán abayro. Ur ay bár yajquíc táyarat sácataro. ²²Cuatán Satanás at icar bin ba bar síujacro. Síuyat baat ur ay bár yajquíc etchacro. Etír Sir chihotá cuitar itro. Sir chihotá cuitar itic etar Sirat imáy chácáro. Ey chihotá cuitar ur ay yajcaro. Etar semar ey jor cuacúr itay beyáyqueyra. ²³Isat ur ay bár yajquíc tehmár sácayqueyra. Cuat Sirat is sehnác rehquít, táyara chiti ima jor cuacúr bur cut suw cut itay beyáyqueyra. Cara Jesucrístoat isat tayar yajaquey tunjac etar, cuacúr itay beyáyqueyra.

Un ejemplo tomado del matrimonio

7 ¹Rábinu, ba cohtín chihotá sínjaquin quin uch wacaro. Uch síhw̄awi. Uwan cohtín chihotá cuitar ítictara, éyinat sihw̄at, imár sacac oceso tas ey chihotá cuitara ítata binro. Cuat isat ítitan, saca waaneyra acsar ey chihotá cuitar ítitiro. ²Baat sinin acu aját uch waquinro. Serat wiya yehw̄yat ra jor ítataro, cohtín chihotá cuitar. Cuat ra ey chínyatra, sera istiy jor chaca rácartara bitarach batro. ³Ra anto chinti cuácayát, sera istiy jor chácajar binro. Cuat ser istiy jor chácayeyra, wiw̄ ey ojcor “isarib,” wacátaro. “Eyta yájcajar bin yajcaro,” wacátaro. Cuat ra chinyat, ser istiy jor chácayatra, cohtín chihotá ruhw̄ útiro. ⁴Eytaan wan baat bachan chihótán yajcata sihw̄ac cuar, baan sácajaquinan wanro. Jesucristo sibár chinír cuitar ba cat ey jor sácajaquinan wanro. Bachan chihótán acsar yajquín ácuán sácajaquinan wanro. Baan Jesucristo acu chiwa yinín acu bachan chihótán yajquín acura sácajaquinan wanro. Chein tac icar bin estají yehnjaquey chiwa yinín acu sácajaquinan wanro. Isat Sir acu caba yajquín acu ey chiwa rehcatáro. ⁵Récaji isat bílara úlara ur ay bár yajca rácartara eyta yajca rabar ítachacro. Eyta ita rabar bachan chihótán yajcayát owár, ur ay bár yajca rácaran cuít rehjecro. Etar táyaran cuít yajacro, íjmár chihotá cuitar. Eyta tayar yajác rehquít bar sácataro. ⁶Bachan chihótát is cuácata yajác cuar, ahra ey yajquín acura is sácajaquinan wanro. Eyta cuácayát, bachan chihótán úchicrias cuihsú bahjác cuitar ítata bini batro. Cuat Sirat ima Ajcan Camur Ey is urá icar wíjacro. Ey chihotá cuitar isat Sir chihotá yajcaro.

El pecado que está en mí

⁷Eyta wacayát, cahujinat sihw̄at, bachan chihótán ay bár biro. Eyta sihw̄a cuar eyta cat batro. Ey ojcor uch síhw̄awi. Aját bachan chihótán síntiir waquít, biyan Sir táyartara, biyan Sir tayar bártara, aját ístajar binro. Bachan chihótán cuitara

“Cahujinay ey racar isoti jaw̄i,” wátiir waquít, cahujinay racar istiti rabar isojóe óraro. Tayar bár seh̄wār istiti isojóe óraro. ⁸Aját bachan chihtán it cuar cahujinay rácaran cuít isoro. As urá ay bár rehquít eyta isoro. Récaji bachan chihtán sintiir waquít, ur ay bár yajca rácara táhnaqui isojoer binro. ⁹Bachan chihtán anto sinti cuat aját ur ay bár yajc tacat istítiro. Etar bachan chihtán sínaytra ajmarát ur ay bár yajquíc tayar itchacro. ¹⁰Ur ay bár yajquíc ques icar as chinín ac chájaquinro. Sir ub cahmor as ohbac itin ac bach yajquín seh̄wāt cat caba yájcajar rehjecro. Caba yajti ques as chinín ac chájaquinro. ¹¹As ur ay bár rehquít cuayir séh̄wajacro. Aját bachan chihtán cuitar ohbac ítata séh̄wajacro. Eyta cuar eyta cat batro. Ur ay bár yajác táyarat as chinín ac chájaquinro. ¹²Etarwan bachan chihtán ayan cuít binro. Icur yajc áyatan, eyan ayan cuitro. Chihtá eyan uniro. Tayar yajc áytiro.

¹³Etar cahujinat waquít, chihtá ay bi sinjac etar bar chinín ac chájaquinro. Eyta tew̄yat cuayar tew̄ro. Chihtá ay bi sinjac étari uw chinátai batro. Cuat urá ay bár yajác etar chinín ac chácáro. Chihtá ey cuitar ajmarát ítitan, Sir tayar yajacro. Isat ijmár táyaran abáy yajác istayta acu chihtá ey wiquir chájacro. ¹⁴Isat ítitan, bachan chihtá Sir Ajcan Cámuran Eyat wíjacro. Eyta cuar asra cajc uch cutar binro. Ur ay bár yájquibro. ¹⁵Aját bitara rehquít eyta yájtara istítiro. Ajmár ur icar ay yajc cun cuar eyta cat yájtiro. Cuat ur ay bár yajc cun bár cuar eyta ay bár yajcaro. ¹⁶Ur istiy cuitar eyta yajc cun bár cuar eyta yajcaro. Cuatán as ur cuitar bachan chihtá cuitatra it cunro. Chihtá ey ay seh̄wār ey cuitar it cunro. ¹⁷Etarwan ur istiy cuitatra eyta yájtiro. As bitara útara ur ay bár yajca racar rehçayat eyta yajcaro. ¹⁸Aját ítitan, ajmár chihtá cuitar urán ayra caba yajca báreyra, ajmár ur istiy sih̄wā cuitar. As urá cuitatra ur ay itin seh̄wac cuar eyta cat ítítiro. ¹⁹Urá cuitar chihtá ay yajc cun cuar yájtiro. Cuat chihtá ay bár bin yajc cun bár cuar aját ey yajcaro. ²⁰Etarwan bitara útara yajc cun bár bi yajquíc étarwan ajmár urá cuitari yájtiro. Cuat as ur istiy cuitar ur ay bár yajca racar rehquít yajcaro.

²¹Eyta cuácayat aját ítitan, aját ur ay yajquín seh̄wāt cat yájtiro. Cuat ur istiy cut ur ay bár yajca racar rehquít ay yájtiro. ²²Ajmár urá cuitar Sir chihtá yajca rácatro. ²³Ajmár urá cut eyta yajca racar cuaquir as icar urá bucáy binan wanro. Ur istiy cutar aját ur ay bár yajca rácatro. As urá eyta seh̄wac rehquít, ur ay yájcajar rehçaro. ²⁴Eyta cuácayat ajmár itit, cuayan wanro. As tan icar ur istiy cut ur ay bár yajca racar aw̄úr yar ey bíyati cuícajatro. Ajmarát tayar yajquín yehnyat, bíyati síwajatro. ²⁵Bíyati cuícajar ey, rehratí síwajar ey Jesucristoatrun bar síwatáro. Eyat cuicátáro. Eyta cuácayat aját Sir quin “oquéy” waquinro. Etarwan ajmár urá icar Sir chihtá yajca rácatro. Cuatán ur istiy cut chihtá ay bár bi yajca rácatro.

La vida que es por el Espíritu de Dios

8 ¹Etarwan bíyinatán Jesucristo ajca ráhçyatan, éyinan Sira tayar yajác ques cuecwa báreyra. Rahcuíc etar éyinan ur istiy cuitar ur ay bár yajca racar cuaquir ur ay bár yájtiro. Cuatán Sir Ajcan Cámuran Ey chihtá cuitar itro. ²Uch

síhwawi. Isat Jesucristo ajca ráhcyatan Sir Ajcan Cámuran Eyat is quin ohbac it ayro. Ur ay bár yajquín síhwā áytiro. Ur ay bár yajquín síhwā ayti rehquít isan sácati itro. ³Récaji uwat bachan chihtá caba yájcjar rehjecro. Ur istiy cut ur ay bár yajca racar rehquít caba yájcjar rehjecro. Etar bachan chihtán ey yajquír cuitar tayar yajquíc étajatro. Ur istiy cut ur ay bár yajca racar rehquít eyta étajatro. Cuat Sirat ima wacjá áyjacro. Is uw sibirán wan yehn áyjacro. Eya is sibirán wan cuar uwat tayar yajác tunin acu yau áyjacro. Eyta yauyat, uwat urá ay bár yajquíc etátaro. Ey chinjác etar, uwat ur ay bár yajquíc et cúntara, bar etátaro. ⁴Is cahujinat ur istiy cut ur ay bár yajca racar rehquíc cuar urá ay bár icar áytiro. Cuatán Sir Ajcan Cámuran Eya chihtá cuitar itro. Eyta ítyatan, urá ay bár yajquíc etátaro. Eyta etír cuitar, bachan chihtán caba yajcaro.

⁵Cahujinat imár urá cut ur ay bár yajca racar rehquít ur ay bár yajcaro. Eyinan ur ay bár icar ayjac etar eyta yajcaro. Ur ay bár yajquín síhwac etar yajcaro. Cuat býinan Sir Ajcan Cámuran Ey chihtá cuitar ítyatan, eyin urán Sir ima Ajcan Cámuran ey ícara bar chájacro. ⁶Býinan urá ay bár icar áyiyatan, éyinan sácayqueyra. Cuatán býinan Sir Ajcan Cámuran Ey chihtá cuitar ítyatan, éyinan Sir jor cuacúr ítayqueyra. Sir jor ohbac ténayqueyra. ⁷Býinan imár urá cut ur ay bár yajca racar rehcyat, ur ay bár icar áyiyat, éyinan Sir jor tena báreyra. Rahcuí cat Sir chihtá rahcua báreyra. Ur ay bár icar ayjac etar ráhcujatro. ⁸Býinan imár urá cut ur ay bár icar áyiyat, eyin ácuán Sira ahní chácajatro.

⁹Cuat baara ur ay bár icar áytiro. Sir Ajcan Cámuran Ey chihtá cuitar itro. Ba urá icar Sir Ajcan Cámuran Ey chajac rehquít ey chihtá cuitar itro. Biyin ur icar Jesucristo Ajcan Cámuran Ey chati rehçáyatra, éyinra Jesucristo owár bini batro. Ey chíwai batro. ¹⁰Cuat ba urá Jesucristo icar chácayat, ba estají rehcaro. Sir tayar yajác ques ba sibár sácata tacat, ba ajcan estají rehcaro. Jesucrístoat ba cuitar caba yajác etar ba ajca estají itro. ¹¹Sir im Ajcan Cámuran Ey ba ur icar etar Sirat ba sicor estají yin áyata síhwataro. Sirat Jesucristo sicor estají yehn áyjacro. Eyat Jesucristo yehn ayir eyta im Ajcan Cámuran Ey chihtá cuitar ba sibár cat sicor eyta yin áyayqueyra. Ima Ajcan Cámuran Ey ba urá icar chajac rehquít sicor yin áyata síhwataro.

¹²Eyta cuácayat, rábinu, isan ur ay bár icar ayin acui batro. Isan urá ay bár yajquín acui batro. ¹³Ur ay bár icar áyeyra bar sácayqueyra. Cuat Sir Ajcan Cámuran Ey chihtá cuitar ur ay bár yajquíc etín acu chájacro. Eyta yajquíc etyat Sir jor cuacúr ítayqueyra. ¹⁴Býinan Ajcan Cámuran Ey chihtá cuitar ítyatan, éyinan Sir sasaro. ¹⁵Ba urá icar Ajcan Cámuran Ey chácayat, ba ayú réhtiro. Cacumát ay bár yajquír, ima patrón cahm ay wíniro. Cuat baara Sir cahmar etach batro. Sir cahmar ba ey sasaro. Baatán ey quin “tetú” wacaro. ¹⁶Ima Ajcan Cámuran Eyat is urá icar chihtá wícaro. Is quin “baan Sir sasaro,” wacaro. ¹⁷Isan Sir ima sasá etar Sirat is quin wícata ey wíçayqueyra. Jesucristo quin wiquir eyta, is quino cat eyta wíçayqueyra.

Jesucristo ruhw̃ujác eyta is cat eyta ruhw̃ata óraro. Eyta ruhw̃ayat is cat carin yin áyayqueyra. Jesucristo cara yehná r eyta is cat ey jor eyta yin áyayqueyra. Eyta yinyat uwat is tamo ay síhw̃ayqueyra.

¹⁸Ah uch cutar is ruhw̃uro. Eyta cuar yahncút isan carin yin áyayqueyra. Yahncút carin yinata síhw̃atra, ah uch cutar ruhw̃ úc cuar bitarach batro. ¹⁹⁻²⁰Sirat bita chájactara bówaran, rirarán, rihan, ruwan, bahnacan anto bahnác óraqui batro. Anto Sir sasá carin yíntieyra orac chácajatro. Eyta cuácayat orac rehquín ac bówaran, rirarán, rihan, ruwan, bahnacan Sir sasá carin yiníc acor itro. Sirat chájacan bówaran, rirarán, rihan, ruwan, bahnacan óraqui batro. Oraqui bár cuar imár chihtá cuitari batro. Cuat Sir chihtá cuitar eyta rehquín chájacro. Uwat ur ay bár yajác etar Sirat eyta rehquín acu waquí r chájacro. Chájareht sicor orac chaquin sehwar eyta rehquín acu chájacro. ²¹Icuran, biyan, bówaran, rirarán, rihan, ruwan yarata bi, ohnata bi, sicor yáraj ar bi, óhnajar bi orac chácaqueyra. Sir sasá Sir jor carin yinyat, orac chácata eyta icúr bi cat, bowar cat, ruwa cat eyta chácaqueyra.

²²Isat ítitan, áhajira icuran biyan, bówaran, ruwan, bahnacan óraqui batro. Ab ojc cut sasá yehnin cab cucayat cuaquir eyta, bowar cat, ruwa cat, bahnác cat eyta cuácáro. ²³Is catum eyta cuácáro. Is ur icar Sirat récaji ima Ajcan Cámuran Ey chajac cuar eyta cuácáro. Is ur icar ima Ajcan Cámuran Ey chajac étarwan isat uchta síhw̃aro. Sirat isan ima sasá chácata síhw̃aro. Is cuitar tayar tunyat, isan sibará ji cuacúr beyata síhw̃aro. Cuat anto is beti cuat is catum óraqui batro. Cuat cuacúr beya rácarat is sácáro. ²⁴Is ur icar síhw̃at, Sir imát yajquín wajaquey sicor cat imát tehmoti yajcáyqueyra. Isat eyta síhw̃ayat Sirat siwin wajacro. Eyta síhw̃ar, eyta is bequic acor itro. “Bequic acor itro,” wacayat, bi ojcor wáctara aját ey ehcunro. Uwat bar itchác ójcori wátiro. Bejequir waquí t bar itchaquir waquí t ey acor icúr acui ítajar binro. ²⁵Cuat ísatra anto istiti cuat síhw̃aro: “Sirat is beyata,” síhw̃aro. Eyta síhw̃ar, isan eyta bequic acor séoti itro.

²⁶Isan eyta cuac cuar, Sir Ajcan Cámuran Eyat is cuitar conro. Is urá bár etar is cuitar conro. Isat Sir ojcor conic síntiro. Icur chiátatara isat istítiro. Eyta cuácayat, Sir Ajcan Cámuran Eyat is cuitar Sir ojcor conro. Uwat ima ajc cutar Sir quin caba téw̃ajar etar eyat is cuitar conro. ²⁷Eyta conyat, Sirat rahcro. Sírtan Ajcan Cámuran Eyat urá cut séhw̃aquey itro. Isat urá cut síhw̃aquey cat itro. Ititan, Sir Ajcan Cámuran Eyat Sir sasá cuitar conro. Sir im chihtá cuitar eyta conro. Eyta conyat rahcro.

Más que victoriosos

²⁸Isat ítitan, bíyinated Sir sehnác jácayatan, bíyinan Sir chihtá yajquín ac chiwa yínyatan, Sir urá cut eyin acu bahnác ay waátaro. Eyin acam bítara utar rehcata cuar Sirat eyin acu bahnác ay wa áyayqueyra. ²⁹Sirat anto cabar cuanti echí itchacro. Bíyinated ey chihtá yahncút rahcuátatara itchacro. Eyta istír rahcuata éyinan ima wacjá urán wan rehquín acu waquí r chájacro. Ima quesmát urán wan rehquín acu waquí r chájacro. Eyta rehcyat ey quesmát tanín chiwan

to chácataro. ³⁰Wacj urán wan rehquín waquír car, eyin eyta yin áyjacro. Eyta yinyat éyinat tayar yajác tayar bár chájacro. Eyta chaquir car eyin carin yin ayin wac bahjacro. Etarwan Sirat imáy eyin cuitar wacáyqueyra, ohbac ítayta acu.

³¹⁻³²Eyta cuácayat uch síhw̄awi. Sirat is acu ay yajcaro. Eyat is tamo seh̄war ima wacjá s̄utiro. S̄uti cuat is bahnaquin cuitar tayar tunin ac ima wacjá yauwin acu ajc waajacro. Eyta yauwin acu ajc waajác étarwan acsar is quin ay bi es yajti icúr bi wícayqueyra. Eyta chih̄tara, uwat is quehsí reh̄cayat, is ruh̄w̄uyat, bitarach batro. ³³Sirat ima sasá cjac eyin acu tayar bár chájacro. Tayar bár chajac etar reh̄ratí is cahmí icar téw̄ajatro. ³⁴Isat Sir tayar yajaquey Jesucristoat tunin chinjacro. Chinír sicor yeh̄njacro. Yehnár Sir owár itro. Sir owár Jesusan uw cáraro. Erar ita rabar Sir cac cahm is cuitar wacaro. Is cuitar eyta wacayat, reh̄ratí bíyati is cahm icar téw̄ajatro.

³⁵Jesucristoat is sehnác etar isan ey ohnor cuícajatro. Is ohbac rehti tacat, is cuac bec tacat, is ruh̄w̄úc tacat, eyat is sehnác jácayqueyra. Eyat is obir yajcáyqueyra. Yayí tacat, oya bár tacat, is ahnúc tacat, yauwata tacat, eyat is sehnác jácayqueyra. Eyat is obir yajcáyqueyra. Ey at icar bin bíyati cuícajatro. ³⁶Sir carit cuitar wacaro:

Isat bah tamo síhw̄ac ques uwat is yauwin ahnuro. Eyinat is ítitan, óbasa séhw̄ati yauwir eyta is cat eyta yauwata síhw̄aro.

³⁷Eyta cuar is Jesucristo at icar bin cuícajatro. Ey at icar bin chíw̄ajatro. Cuat is ahnúc cuar ísatra caba burbar yajcáyqueyra. Jesucristoat is sehnác reh̄cayat, isat burbar yajcáyqueyra. ³⁸Aját uní síhw̄aro. Isan Sir at icar bin bíyati cuícajatro. Is estají tacat, is sácacac tacat, ey at icar bin cuícajatro. Sir cuacúr cacminát cat, ricminát cat, cuiquinát cat Sir quin is sehnár yajquíc et áyajatro. Aha uch cutar cat, yahncút cat Sir quin is sehnár yajquíc et áyajatro. Cámuran cuít binat cat, carin cuít binat cat Jesucristo at icar bin is cuícajatro. ³⁹Cuacúr abá cut binat cat, wahn̄tar caje cut binat cat Sir quin is sehnár yajquíc et áyajatro. Is Cara Jesucristo chihtá cuitar Sirat is sehnác jájacro. Eyta sehnác jácayat, cuacúr abá cutar binat, cajcan teyan bahnác cutar binat, reh̄ratí, bíyati ey at icar bin bitách síw̄ajatro. Bitách cuic béyajatro.

Dios ha escogido a los de Israel

9 ¹Aját Jesucristo ub cahmar uní wacaro. Aját sucuar téw̄tiro. Sir Ajcan Cámuran Ey bow̄ cuitar cuar aját tew̄ro. ²As Israelin rácaran cuít conro. Israélinat Sir chihtá waca técayat, asan cueat urá sequír yar éytaro. ³Aját ajmár uw cuitar Sir tayar túnatair waquít, eyta tunin acu ajmár cab oc icar wahnata binir waquít eyta wahnata bin óraro. Ajmár uw sehnác reh̄quít ajmár chihtá cuitar eyta wahnata bin óraro. Asan ajmár chihtá cuitar Jesucristo at icar bin siu teta bin óraro. ⁴Uw éyinan israélinro. Eyta reh̄quít israelin eyin Sir sasír reh̄jéquinro. Eyin cahmoran Sir iman oca tebir cuar bijáquinro. Eyin cuitar imát waquín wajáquinro. Eyin at icar bachan chihtá wíjaquinro. Eyin quin ima tamo síhw̄an acu bitara yajcátatara eh̄cujáquinro. Eyin quin bomcara cuít wiquin wajáquinro. ⁵Eyinan

úchicrias Abraháminat cohná bahjáquinro. Israel eyin sicar bin Jesucristo uchta sibirá ji yehnjáquinro. Jesucristo Sir quéneyro. Ey ojcor uwat ay wacátaro. Amén.

⁶Sir imát eyin cuitar yajquín wajaquey cahujinat sihw̄at, Sirat yajti wácacaj síhw̄ata óraro. Eyta sihw̄ac cuar eyta cat batro. Cuat uch síhw̄awi: Israelat bomcar cohná bahjaquin cahujinra israelin quen bini batro. ⁷Abrahamat bomcara cohná bahjaquin cat cahujinra Abrahamay quen bini batro. Sir carit cuitar wacaro: “Abrahamu, bah bomcaran Isaac sícara binra cohnáyqueyra,” wacaro.

⁸Etarwan, sibirá uchta bi yehnár cuitari Sir sasá chácajatro. Cuat Sir imát eyta chaquin wac bahjác rehquít Sir sasá chácataro. Sir chiwa chácataro. ⁹Sirat récaji Abraham quin wac bahjacro: “As bar istiy cuácayat wiquinro. Sara wacjá yahnor cuácayat wiquinro,” wajacro.

¹⁰Rebeca sasá cat éytaro. Rebeca ohc cut Isaacay sasá bucáy cohnájáquinro. ¹¹⁻¹²Sasá eyin ojcor Sirat wajacro. Anto yinti ohcuá sar cuat wajacro. Anto bitara útara áytara, ay bártara yajti cuat, eyin ojcor uchta wajacro: “Cahmor eyan yahncút ey acu cacúm chácayqueyra,” wajacro. Sir ima chihtá cuitar, ima urá cuitar uw caquic ojcor wacaro. Cuatán Sirat eyta jaw wátieyra uwat cuayir síhw̄ata óraro. Uw imát ur ay yajác étatra Sirat eyin cajac, síhw̄ata óraro. Eyta cuar eyta cat batro. Sir im urá cuitar uw cácaro. ¹³Eyta cuácayat Sir carit cuitar wacaro: “Jacobra aját rácatro. Cuat Esaú etach rácaro batro,” wajacro.

¹⁴Sirat eyta yajc ojcor “Sirat eyta yájcajar bi yajcaro,” bitách wácajatro. ¹⁵Uchta síhw̄awi. Sirat Moisés quin wajacro: “Aját biyin cuitar wac cúntara, eyin cuitar waquinro. Biyin siu cúntara eyin síwinro,” wajacro.

¹⁶Etarwan uw chihtá cuitari yájtiro. Uwat ur ay yajác étari yájtiro. Cuat Sir imaistir chihtá cuitar uw cuitar wacaro. ¹⁷Sirat Egipto cara Faraón quin wajaquey carit cuitar cuihsujacro. Uchta wajacro: “Ajmár chihtá cuitar bah cara yehn áyjaquinro,” wajacro, Sirat Faraón quin. “Bah cara yehnyat as urán to bi cuitar ba ruhw̄ujacro. Eyta ruhw̄uyat uwat itit, as urán toro. Uwat eyta istayta acu bah yehn áyjacro,” wajacro, Sirat Faraón quin. “Eyta bira cajc bahnác cuitar uwat aját yajác chihtá tew̄ic rahcuáyqueyra,” wajacro.

¹⁸Etarwan Sir imát biyin cuitar yajc cúntara eyin cuitar yajcaro. Cuatán biyin quin rahcua ay cun bártara, eyin quin rahcua áytiro.

¹⁹Eyta cuácayat istiyát wacata óraro. “Bahnacan Sir ima chihtá cuitar yájctara, is úwatra Sir ima chihtá bár cuarta icúr bi yájcajatro,” wacata óraro. “Eyta chihntara Sirat isat ur ay bár yajcayat ques cuécwajatro,” wacata óraro. ²⁰Eyta wacátatara bucoy uchta síhw̄awi. Baan uwro. Baan Siri batro. Sir ima ojcor cuáyitra tew̄ti jaw̄i. Tabir oroc tamo síhw̄awi. Rucac tew̄átair waquít, tabir óroquib quin “¿Bitara reht asan ayan cuít órotica?” wácacajar binro. Eyta wácacajar bin eyta baat cat Sir quin eyta wácacajar binro. ²¹Tabir oroquib ima chihtá cuitar bitara órontara eyta óraro. Tabir quest istiy sícara bin ruca óriquenán ehchí bíntara, ayan eta cuti bíntara bar órotaro. Tabir óroquibat ima chihtá cuitar tabir oror eyta Sirat cat ima chihtá cuitar uwan bitar útara yehn áyataro.



(Romanos 9.21)

²² Uch cat síhw̄awi. Cahujín uw cab oc icar áyata cuar, Sirat récaji áytiro. Eyin eta jaw̄ cuécwata cuar, cab oc icar ayti bachuro. Sirat uw récaji cuécujquir waquít uwat ey urán ajcan to bi istata yajác óraro. Uw quin eyta istá ay cun cuar récaji uw cuécuti báchuro. Cab oc icar ayti báchuro.

²³ Cahujín racar cue rehquít eyta ayti báchuro. Récaji cuécuti cuácayat, uwat ítitan, Siran uw racar cue rehcaro. Eyta cuácayat, uwat eyta istayta acu Sirat eyta báchuro. Uw racar cuean cuít rehquíc istayta acu báchuro. Uw eyin anto cabar cuanti echí jáquitan ima jor cuacúr itayta acu caquir chájacro.

²⁴ Cuacúr beyin acu isan ey caquir chájacro. Sir imát cájaquinan isan éyinro. Judfoin sicar bin étani cátiro.

Judfo bár bin sicar bin cat caquir chájacro, imáy chaquin acu.

Los judíos y el evangelio

²⁵ Oseasat ey ojcor úchicri cuihsú bahjacro: Sirat wajaquey cuihsú bahjacro.

Uwa ajáy bár bin ojcor waquinro: “Ahra uyin ajmár uwro,” waquinro. Uw aját racar bár bin ojcor waquinro. “Ahra eyin aját rácatro,” waquinro.

²⁶ Bi cutar itquin ojcor “As uw batro,” wajáctara, im ey cutar eyin ojcor uwat wacáyqueyra: “Ahra baan Sir estají ey sasaro,” wacáyqueyra, uwat. Oseat Sir chihotá cuitar eyta cuihsú bahjacro.

²⁷ Isaíasat cat israelin ojcor úchicrias wac bahjacro:

Umít saw̄ ú bálnajar eyta Israelin cat saw̄ ú bálnajatro. Eyta cuar síwicra ricá conu bin síwayqueyra. ²⁸ Tayar yajác ques Sir imát cab rehti cuéwayqueyra.

²⁹ Isaíasat uchta cat wajjacro:

Sirat is bomcar sicar bin sutiir waquít, Sodomín sutír eyta, Gomorrin sutír eyta is cat eyta sutata binro.

Isaíasat eyta cuihsú bahjáquinro.

³⁰ Etarwan judfo bár bin Sir ub cahmar tayar bár chájacro. Eyinat tayar bár chaquin acu icúr yajti cuar, Sir imát tayar bár chájacro. Sir chihotá rahcyat, eyin ácuán tayar bár chájacro. ³¹ Cuatán israelinat imarat tayar yajác sicor tayar bár chaquin síhw̄ar, bachan chihótán yajquín síhw̄ajacro. Eyta cuar bach yajquít cat caba yájtiro. Caba yajti etar im eyta tayar chi rehjecro. ³² Eyinat imár chihotá cuitar caba yajcata síhw̄ajacro. Eyta síhw̄ajac etar Jesucrístoat

eyin síwata cuar síutiro. Eynat ey chihtá rahcti etar síutiro. Uw ibit aw̄at bicayat ac cuitar búnabo ter eyta judíoinat cat Jesucristo chihtá cati etar imár ruhw̄uro. ³³Sir carit cuitar úchicri wac bahjacro. Jesucristo ojcor wajacro:

Ac eyan uw buno yarata bi chájaquinro. Jerusalén pueblo icar chájaquinro. Ac ey cuitaran uw yau yarata bi chájaquinro.

Bíyinatán aját chájaquey chihtá ráhcyatan, cuáyari rahcua báreyra. Sir carit cuitar eyta wacaro.

La salvación por fe

10 ¹Rábinu, ajmár tan bahnác cuitar sehw̄a rabar, asan israelin racar conro. Israelin cuitar Sir quin etiti conro, Sirat eyin síwayta acu. ²Aját ba quin wacaro. Israel éyinat Sir chihtá caba yajca rácatro. Eyta cuar chihtá ey yajquít cat batro. Chihtá quen ey istiti etar caba yájtiro. ³Sir imát uwat tayar yajacan sicor tayar bár chajac chihtá istítiro. Istiti etar Sir chihtá cati cuar imár chihtá cuitar tayar bár chaquin síhw̄ajacro. ⁴Cuat Jesucristoat bachan chihtán caba yajacro. Ima chihtá ráhcuiquin tayar bár jaquin acu caba yajacro.

⁵Moisesat uwan tayar bár chaquin acu bacha yajquíc ojcor uchta wac bahjacro, “Bíyinat bach caba yajquítara ohbac ítayqueyra,” wac bahjacro.

⁶Cuatán chihtá uyra istiró. Chihtá uy rahcuír cuitar tayar bár chácataro. Chihtá uyan úchtaro. “Ba cuayir síhw̄ati jaw̄i.” Cahujinat tan síhw̄at, uwat cuacúr bin ucay bítieyra, Cristo usár rácajar síhw̄aro. Cahujín tan eyta síhw̄ac cuar eyta cat batro. Cristo cajc uch cut bar wijacro. ⁷Cahujín tan síhw̄at cat, uwat wahntará cajc cut Cristo ucay bítieyra, Cristo sácajaquin tac icar bin sicor waajar, síhw̄aro. Cahujín tan eyta síhw̄ac cuar eyta cat batro. Jesucristo sácajaquin tac icar bin estají bar yehnjacro. Eyta chih tara cahujinat síhw̄ar eyta baatán éytara síhw̄ati jaw̄i.

⁸Cuat chihtá queney úchtaro: “Chihtá eyan cajc istiy ucay ben síhw̄a cat usár behmár ácotro. Behmár ur ícatro. Behmár cuw cutar chihtá ey tata binro.” Isat ehcúc uyan ey chihtaró. Ey chihtá rahcyat, ba síwataro.

⁹Eyta chih tara baat cuw cutar, “Jesús as cáraro,” wacata binro. Ur icar cat “Sirat Jesús sicor estají yehn ayjac,” síhw̄ata binro. Eyta wacayat, eyta síhw̄ayat ba bar síwayqueyra. ¹⁰Uwat ur icar Jesucristo chihtá rahcyat tayar bár chácáro. Cuw cutar uw quin “as Jesús chíwáro,” wacayat bar síwayqueyra. ¹¹Sir carit cuitar wacaro: “Bíyinatán ey chihtá ráhcyatan, cuayar rahjác síhw̄a báreyra,” wacaro.

¹²Sirat ítitan, judíoinat cat, judío bár bin cat owáraro. Cara istaná bin bahnaquin acu cara yehnjacro. Cara istaná binat bahnaquin obir yajcaro. Bíyinatán ey ojcor cónyatan, eyin obir yajcaro. ¹³Sir carit cuitar wacaro: “Bíyinat Sir ojcor cónyatan, eyin síwayqueyra,” wacaro.

¹⁴Cuatán ey ojcor conín acu ey tamo síhw̄ataro. Ey tamo síhw̄atieyra, bitách cónajatro. Eyta cat ey tamo síhw̄an acu uwat ey ojcor tew̄quey rahcuátaro. Ey ojcor tew̄quey ráhctieyra, bitách síhw̄ajatro. Eyta cat ey ojcor tew̄quey rahcuín acu cahujinat uw quin ehcw̄ataro. Uw quin ehcútieyra,

uwat bitách ráhcuajatro. ¹⁵Eyta cat ehcwáy beyin acu uwa ehcwáy áyataro. Ehcwáy áytedyra, bitách béyajatro. Etar uch síhw̃awi, Sir carit cuitar wacaro: “Uwat chihtá ay bi ehcwáy racayat, uwat ítitan, yarsa racaro,” wacaro.

¹⁶Eyta cuar quir binat ria cati yajcaro. Ey ojcor Isaíasat Sir carit cuitar wajacro, “Siru, isat ehcuquey uwat ráhctiro,” wajacro. ¹⁷Eyta wajác étarwan Sir chihtá ráhctitara, Sir tamo síhw̃ajatro. Cuat ey rahcuír car Sir tamo síhw̃ataro. Cahujinat Jesucristoat yajác chihtá ehcwayat rahcuír car Sir tamo síhw̃ataro.

¹⁸Etar aját uní wacaro. Eyin quin chihtá ey ehcwayat cucách cuitar rahjacro. Uch Sir carit cuitar wac bahjác síhw̃awi:

Sir ajcan, Sir urán cajcan teyan bahnác cutar, Sirat yajác chihtá ehcuro. Ehcwayat uwat ey itro.

¹⁹Aját bucoy cat ba quin wacaro. Israélinat it binro. It cuaquir ria cati yajacro. Moisesat israelin quin wac bahjacro:

Sirat im chihtá sinti bin obir yajcayat, baan Sir sicar es yajcáyqueyra.

Baan uw urá bár bin acu túrayqueyra.

²⁰Isaíasat cat rooti tew̃jacro. Uchta wajacro:

Sir it cun bár binat Sir itchacro. Ey istiti bin ubot Sir ima bar waajacro.

²¹Cuatán Israelin ojcor Sirat wajacro:

Aját eyin quin tenat cat rahra éyinat as chihtá rahcti jájacro. Eyinat chihtá ay bi quehsujác binro, wajacro.

Los de Israel que son salvos

11 ¹Eyta cuar aját ba quin wacaro. Sirat israelin cájaquin bahnaquin ajcá bár etítiro. Uch síhw̃awi. Asan Israel uwro. Asan Benjaminin cut Abrahamin bomcatró. ²Sirat israelin récaji istír car imáy cájacro. Etar Sirat eyin ajcá bár etítiro. Elíasat úchicria Sir jor tew̃jác chihtá rahcwi. Israelin cahmí icar tew̃jác chihtá rahcwi. Sir carit cuitar wacaro.

³“Elíasat wajacro: ‘Siru, bah úwatan behmá chihtá ehcuquin bahnaquin tíw̃jacro. Yera acar behmá tamo sihw̃an acu chajac ey cat butí téjecro. Eyta cuácayat, as istír binat ba tamo séhw̃aro. Etar éyinat as cat yauwin ahnuro,’ wajacro, Elíasat.”

⁴Etar Sirat ey quin wajacro: “Bah ístiri batro. Cajc Israel cutar uwat as tamo síhw̃aquinan cuisa siete milro. Sirir Baal ojcor conti binan cuisa siete milro,” wajacro, Sirat Elías quin.

⁵Uchicri israelin sicar bin uw birách bár binat Sir chihtá wácati eyta aha cat judóin sicar uw birách bár binat cat Sir chihtá wácatiro. Sirat ima chihtá cuitar biyin cájactara, éyinat wácatiro. Sir ima chihtá cuitaran uw birách bár bin sehnác etar cájacro. ⁶Etarwan uwat bach yajác étari, ur ay yajác étari imáy cátiro. Bach yajquíc etar imáy cájaquir waquít, urá ay yajquíc etar imáy cájaquir waquít, “Sir imát uw sehnác rehquít cajac,” wácajatro.

⁷Eyta bira israélinat imár chihotá cuitar Sir ub cahmar ur ay rehquín acu yajquít cat batro. Cuat Sirat ima chihotá cájaquin itit, ur ayro. Cahujinra urá bár, bow̃ bár rehjecro. Sir chihotá ráhcuajar rehjecro. ⁸Sir carit cuitar wajacro: Sirat eyin urá bár bow̃ bár chájacro. Cucáj bár chájacro. Aha acat tas im éytaro.

⁹Davidat cat Sir carit cuitar cuihsú bahjacro:

Eyinat ur ay bár yajca rabar ira cat ruwa cat ahní cohcaro. Eyta coh rabar ur ay bár yajquíc istayta acu cuécuwi. Uchta cohquíc cuar, Siru, ir ey cut ruw ey cut sicor imár cuécuwi. Ruwasir chich ícar questár eyta, quibachít cahm yawwir eyta uw eyin cat éytaan wan cuécuwi. Eyinat ur ay bár yajác ques eyta cuécuwi. ¹⁰Eyinat istiti acu eyta chaw̃ i. Eyinat canar etiti yajquín acu ahár aywi, wajacro, Davidat.

La salvación de los que no son judíos

¹¹Judíoinat Jesucristo chihotá cati rehjec cuar sicor urá ay téhmojoj bini batro. Uch síh̃wawi. Judíoinat Jesucristo chihotá cati cuácayat, Sirat acsar judío bár bin quino ima chihotá ehcú áyjacro. Eyin siwin acu ima chihotá ehcú áyjacro. Ehcú ayir car, judíoinan chihotá ey sicar es yajcata seh̃war, judío bár bin quino ehcú áyjacro. ¹²Acsar uch síh̃wawi. Judíoinat Sir tayar yajcayat, judío bár bin Sirat síuro. Judíoinat chihotá cati waca técayat, judío bár bin acam ay rehjecro. Eyta bira judíoinat Sir chihotá sicor cácayatwat, Síratan uw cuitar ayan cuít yajcáyqueyra.

¹³Ahra aját ba judío bár bin quino tew̃ inro. Judío bár bin quino siw̃ in acu Sirat asan ima chihotá ehcuquib yehn áyjacro. Eyta cuácayat aját uwan to bin quin bucoy cat bucoy cat wacaro: “Judío bár bin quin aját Sir chihotá ehcuro,” wacaro. ¹⁴As uw judíoinat ey chihotá sicar es yajcayta acu eyta ehcú wacaro. Es yajquír éyinat cat rahcuayta acu eyta wacaro. ¹⁵Sirat judíoín ajcá bár etchacro. Eyinat ey chihotá rahcti etar ajcá bár etchacro. Judíoinat ey chihotá rahcti rehquít sácajaquinan wanro. Etar Sirat eyin ajcá bár etír car, judío bár bin imáy chaquin cácaro. Sirat judíoinat ima chihotá cati cuácayat judío bár bin acu ay yajacro. Eyta chihotara judíoinat Sir chihotá cácayatwat, ayan cuit yajcátaro. Eyin sácajaquinan wan chajac cuar, Sir chihotá cácayat sicor estají yinír eyta rehcháyqueyra. ¹⁶Uwat cuna yajquín eb tacayat cahujéy Sir acu ajquír chácáro. Eyta chácayat, Sirat ítitan, eban bahnacán imáy ajquír chaquir éytaro. Caruc cat éytaan wanro. Caruc sihyán restá bár orac rehquíctara, caruc cat bahnacán éytaro. Cuicar cat restá bár orac rehcaro. “Eb” wacayat eb ojcor wátiro. Abraham ojcor wacaro. “Caruc sihyá” wacayat cat Abraham ojcor wacaro. Abraham Sir jor tan wan etar ey bomcar cat Sir jor tan wan rehcatáro.

¹⁷Judíoín etí tejec chihotá ehcún acu caruc cuicar chihotá tew̃ inro. Caruc cuicar uba chati cuácayat taquir te sicaro. Caruc cuicar taquir te siquir eyta, Sirat judíoín cat ajcá bár etí téjecro. Ajcá bár etí ter car baan imáy cájacro. Etar baan úchtaan wanro. Uwat bowar bin oliva caruc cuicar rocaro. Roquír at cut rijác oliva cuicar ojcor cuicar bówara bin rojóc ey questaro. At cut rijác

ey ojcor sucón acu questaro. Eytaan wan bowar oliva cuicar at cut rijác bi ojcor questár eyta, ba cat Sir uw bár cuar Sirat baan ima uw yinín acu cácaro.

¹⁸Eyta cuácayat behmaran judíoín cuitra síhw̄ati jaw̄i. Eyin cuayin síhw̄ati jaw̄i. Cuat uch síhw̄awi. Judíoínat Sir chihtá rahcyat ba chihtá cuitari ráhctiro. Cuat baatrá eyin chihtá rehquír rahjacro. ¹⁹Baat wacata óraro: “Cuicar bowar bin rojóc ey questán acu caruc rijác ima cuicar taquír ter éytaan wan, isan Sir uw yinín acu Sirat judíoín cat ajcá bár etí téjcro,” wacata óraro. ²⁰Eyta wacayat uniro. Judíoínat Sir chihtá rahcti etar, ajcá bár etí téjcro. Cuat baat ey chihtá rahcyat, ba cácaro. Eyta bira baat Sir tamo yají síhw̄awi. Behmaran uw bahnaquin cuitra síhw̄ati jaw̄i. ²¹Baan bahnaquin cuít síhw̄ar, Sir tamo síhw̄atieyra, ¿Sirat ba cat ajcá bár etí téjca? Récaji judíoín etí ter eyta ¿ba cat etí téjca?

²²Behmár tamoan cuít síhw̄ati cuar, Sir tamo síhw̄awi. Sirat uw siwic cat síuro. Cuat uw cuecuc cat cuécuro. Uwat Sir chihtá waca tijeác eyin Sirat cuít cuécuro. Cuat ba Sirat síuro. Baat ey chihtá rahcyat, ba síuro. Cuat rahcti cuácayat, ba cat cuécwayqueyra. ²³Judíoín cat éytaro. Eyin Sir chihtá sicor rahcyat, Sirat eyin cat síwayqueyra. Sirat ima urá cuitar eyin sicor ima uwa yin áyayqueyra. ²⁴Oliva caruc tamo bucoy síhw̄awi. Bowar oliva cuicar roquír car at cut rijác ey ojcor questár sucoyat ayro. Cuatán oliva ima cuicar tac tejec ey sicor questáyatwat yarsa sucótaro. Eta jaw̄ ba Sir uw bár bin cuar, Sir uw cáquictara, Sir uwa ajcá bár etí téjequinwat sicor yarsa cácataro.

La salvación final de los de Israel

²⁵Rábinu, Sirat as quin síw̄ jaquey rahcwi. Eytair báreyra behmár urá bahnaquin cuít síhw̄ata óraro. Uch rahcwi. Judíoín Sir chihtá cac cun bár rehquít urá tehmótiro. Judío bár binan Jesús chiwa caba yiníc oco tas judíoínan eyta tehmoti rehcaro. ²⁶Etar judío bár bin Jesús chiwa caba yinyat judío bahnáquinat cat Sir chihtá rahcuáyqueyra. Eyta rahcyat, Sirat eyin cuitar cat wacáyqueyra. Sirat carit cuitar ey ojcor wacaro:

Uw Súquib Jerusalén pueblo itquin tac icar bin yehnáyqueyra.

Yehnár israelin Jacobin ur ay tehmóyqueyra. Ur ay bár yajti acu síwayqueyra, wacaro. Bucoy cat Sirat wacaro. ²⁷Aját uchta yajquinro. Eyinat as tayar yajác aját tayar bár cháquinro, wacaro.

²⁸Judíoínat Jesucristo chihtá rahcti etar éyinan Sir acu quehsí waajacro. Ba judío bár bin cuitar Sirat wacayta acu eyta waajacro. Cuatán Sirat récaji eyin cohtín quin Abrahamin quin eyin bomcara ima uw chaquin wac bahjacro. Eyta chihtara éyinan sehnác binro. Cohtín sehnác rehquít eyin cat sehnác binro. ²⁹Sir imat uw at icar cajc wiquin wac bahcayat, imáy caquin wac bahcayat, eyta tew̄quey tehmó báreyra. Chihtá ajquitra tew̄a báreyra. Etarwan éyinan sehnác binro. ³⁰Ba judío bár binat récaji Sir chihtá rahcti cuaquir ahra Sirat ba cuitar wacaro. Judíoínat ey chihtá cati waca técatat, ba cuitara wacaro. ³¹Ahra éyinat rahcti wácajacro. Ba cuitar waquír eyta eyin cuitar cat eyta waquín seh̄war Sirat récaji síuti yajacro. Ima chihtá cati etar, síuti yajacro. ³²Eyta rahcti etar

Sirat uw bahnaquin ur ay bár icar ayjac istír wajacro: “Uw imár chihtá cuitatra síwajatro,” wajacro. Eyta waquíur uw etchacro. Judfoin cat judío bár bin cat “imár chihtá cuitatra síwajatro,” waquíur uw etchacro. Bahnaquin cuitar cue rehquín sehwar bahnaquin siwin sehwar eyta waquíur etchacro.

³³ Bahnacan Sir im at ícatro.

Eya urán ajcan chihtán tahnacro.

Bíyati Sir urá sin bahnajatro.

Sirat yájqueyan uwat bahnác istá báreyra.

³⁴ Sirat ima urá cuitar icúr séhwactara rehratí ístajatro. Sir cuitar bíyati síhwajatro.

³⁵ Uwat Sir quin icurí wícajatro. Etar Sirat uw quin táyari batro.

³⁶ Bahnacan Sir chihtá cuitar chácáro.

Bahnác Siray binro.

Ey tamo sehwan acu bahnác waquíur chájacro.

Ey ojcor wawí, “Siran bahnác cuitatro. Cabar tinic tacat bur cut suw cut Siran bahnaquin cuitar rehcaýqueyra,” wawí.

Amén.

La vida consagrada a Dios

12 ¹Rábinu, aját ba quin conro. Sirat ba tamo sehwar cue rehquít ba obir yajcaro. Sirat ba ac eyta yajc tehmár ba urán ey icar chawí. Moisés chihtá cuitar uwat Sir tamo sihwán acu ruw yawwir eyta, baat cat Sir tamo sihwán acu éytaan wan ba urán ey icar chawí. Sir ima tamo wácati sihwán acu eyta chawí. Ey ahní rehcaýta acu eyta chawí. Sirat eta jawí ima tamo sihwán acu waquíur chájacro. ²Sir tamo síhwati binat sihwár éytara síhwati jawí. Cuat Sirat ba urá tehmayta acu conwi. Eyta conyat Sirat ba urá ay chácayqueyra. Etar baat Sir chihtá cuitar yajquíc sínayqueyra. Baat ey chihtá yajquíur ítitan, ayro. Cábaro. Eyta yajcayat, Siran ahniro.

³Sirat ima chihtá cuitar asan Jesucristo chihtá ehcuquib yehn áyjacro. Eyta cuácayat aját ba quin wacaro. Istiy quin, istiy quin, istiy quin wacaro. Behmár tamoan baan cahujín cuitra síhwati jawí. Behmár tamo síhwajar bi síhwati jawí. Cuat ay síhwawi. Sirat ba quin icúr yajcayat acu urá wícaýatan, eyta yajquín síhwawi. ⁴Aját uch waquinro. Sibár ojcor síhwawi. Sibará istanác cuar at ub cat, quescara cat, ub cat ajquitro. At ub cuitar cat canar istiy yajcaro. Quescara cuitar cat canar istiy cat yajcaro. Eyta jawí bahnacan ajquitro. Ajquíur rehquít quescarat yajquíur eyta at ubatra éytara yájtiro. ⁵Uw sibirán bitáratara is chiwa cat éytaro. Isan bahnáquinan ricá quir binro. Quir bin cuar Jesucristo chihtá cuitar urán istanacro. At ub cat quescara cat ajquíur cuar, sibár istanacro. Is cat rahra rahra ijmaran uw istán rehcaro. ⁶Ur istanác cuaquir Sirat istiy quin canar istiy, istiy quin canar istiy, istiy quin canar istiy yajc ayro. At ubat canar istiy yajquíur eyta, quescarat canar istiy yajquíur eyta uwat cat eyta yajcaro. Canar bahnacan owárai batro. Eyta cuácayat bi canar yajcayat acu urá wícaýat eyta ay

yajw̃ i. Sirat ur icar chihtá anto ehcuti bi ehcwayta acu wícayat, bita wíjactara, eyta ehcuwi. ⁷Cahujín cuitar yajcayta acu urá wícayat, cahujín cuitar ay yajw̃ i. Uw síw̃ayta acu urá wícayat, eyta siw̃ i. ⁸Cuécuquin tan wan chácayta acu urá wícayat, eyta tan wan chaw̃ i. Ira cat, ray cat, oya cat uw quin wícayta acu Sirat ba at icar wícayat, es yajti wiw̃ i. Uw ayin acu urá wícayat, ay sihw̃a rabar aywi. Cuayin obir yajcayta acu urá wícayat, eyin tan wan obir yajw̃ i.

Deberes de la vida cristiana

⁹Urá istanác cuitar uw sehnác chaw̃ i. Chihtá ay bár eyra wácawi. Ay bi eyra wácati caw̃ i. ¹⁰Rabín rahra rahra sehnác eyta ba cat rahra rahra eyta sehnác chaw̃ i. Cahujín ajcá ji béowi. ¹¹Sir acu canar ohca sinti yajw̃ i. Ey yajca racar reh̃w̃ i. ¹²Sirat ba ima jor itay beyata etar ahñí reh̃w̃ i. Uwat ba ruh̃w̃uyat ajc sacac tan uw̃ i. Sir ojcor séoti conwi. ¹³Sir chiwa icúr táyoctara, racar wiw̃ i. Iratara, úbachtara wiw̃ i.

¹⁴Bíyínanat Jesús chihtá ques ba ruh̃w̃ úyatan, Sirat eyin ruh̃w̃ayta acui conti jaw̃ i. Cuatán eyin cuitar Sir ojcor conwi.

¹⁵Bíyínan ahñí reh̃cáyatan, eyin owaran ahñí chaw̃ i. Bíyínan cue reh̃cáyatan, eyin owaran cue cat chaw̃ i.

¹⁶Ba rahra rahra tan wan chaw̃ i. Cahujinan ba owara cúwajatra síhw̃ati jaw̃ i. Cuat cuayín owár ténawi. Behmaran cahujín cuitra síhw̃ati jaw̃ i.

¹⁷Uwat ba ruh̃w̃uyat sicor rahra ay batra yajti jaw̃ i. Cuat urá ayan tahnác chaw̃ i. Bahnáquinat ítitan, bitara yajcáyatan áytara, eyta yajw̃ i. ¹⁸Behmár cuitatrun bahnaquin owár tan wan ítuwi. ¹⁹Rábinu, aját baan sehnacro. Uwat ba ruh̃w̃uyat ques técuati jaw̃ i. Sir imát eyin cuécwata seh̃w̃ar técuati jaw̃ i. Sir carit cuitar wacaro: “Sirat wacaro: ‘Tayar yajác ques as ístirat cuécwata binro. Tayar yajác ques ajmarát cuécunro,’ wacaro.”

²⁰Cuat Sir carit cuitar wajác chihtá yajw̃ i. “Ba quehsí bin yayí reh̃cayat, yayín acu wiw̃ i. Cuc wini reh̃cayat, yahn acu wiw̃ i. Eyta wícayat éyinat im ur icar síhw̃ataro. ‘Aját ay bár yajacro. Eyta cuaquir eyat as obir yajcaro,’ séhw̃ataro. Etar imát ur ay bár yajác seh̃w̃ar cue reh̃cátaro.”

²¹Ur ay bár binat ba quin ur ay bár yajc ayit cat baat éytara yajti jaw̃ i. Cuatán ur ay yajw̃ i. Ur ay yajquír cuitar burbar yajcáyqueyra. Baat eyta yajcayat éyinat ístír ur ay tehmóyqueyra.

Obediencia a los poderes públicos

13 ¹Ba bahnáquinat gobierno carin chihtá rahcwi. Gobierno carin Sir chihtá cuitar yinjác etar rahcwi. Sir imát gobierno cárinat uw eyta ayin waquíur chájacro. ²Gobierno carin chihtá uwat ráhctieyra, éyinat uw ruh̃w̃áyqueyra. Sirat chajac carin chihtá rahcti wácayat ojcor cuécwayqueyra. ³⁻⁴Uwat urá ay yajcayat, gobierno cahmar ayú batro. Cuat urá ay bár yajcayat eyin cahmar ay wíniro. Sirat ba tamo seh̃w̃ar eyin yin áyjacro. Eyta cuácayat ur ay yajw̃ i. Ur ay yajcayat, gobierno cahmar ayú bár

rehcáyqueyra. Gobierno cárinat ba ojcor cat ay tew̃ áyqueyra. Cuatán urá ay bár yajcayat, eyin cahmar ay wini rehcaýqueyra. Eyinat icúr ay bár yajti cuatra tecua báreyra. Síratan uwat tayar yajquíc ques técuayta acu eyin yin áyjacro. ⁵Eyta bira eyin chihotá rahcwi. Eyinat ba cuécuti acu eyin ajc rahcwi. Cuatán acsar behmarat Sir chihotá cuitar ur ay yajquíc sinjac etar eyta rahcwi.

⁶Ey chihotá sih̃war cat, gobiérnoat ray ba at cut ey sicar cahují ey chícayat, baatán túnata binro. Gobierno cárinat Sir acu ruóc etar eyta túnata binro. Gobierno cárinat uw quin ur ay yajc áyquinro. Etarwan éyinat eyta ruoro. ⁷Eyta cuácayat baatán bita túnata bíntara, eyin quin eyta tunwi. Biyin quin ray túnata bíntara, eyin quin ray tunwi. Biyin tamo ay síh̃wata bíntara, eyin tamo ay síh̃awi. Biyin ajcá ji béyata bíntara, eyin ajcá ji béowi.

⁸Tayar tunic cab cucayat, túntira yajti jaw̃ i. Rahra ráhrarun sehnác jaw̃ i. ⁹Moisesat carit cuitar uch yajti ac chihotá wac bahjacro: “Cahujín wiya besir yajti jaw̃ i. Cahujín sera cat besir yajti jaw̃ i. Uw cat yauti jaw̃ i. Istiy ohnor bes cat yajti jaw̃ i. Istiy at cut ey racar cat isoti jaw̃ i,” wac bahjacro. Eyta bita wac bahjacro. Eyta wac bahjaquey bahnác caba yajquín acu uch yajw̃ i. Uch yajcayat, ey bahnacan cábaro. Uch chihotá istanác bi yajw̃ i. “Bahat behmá sibár ajcá ji beyar eyta cahujín cat eyta ajcá ji béowi,” wacaro.

¹⁰Bíyatan cahujín sehnác rehcaýatan, bíyatan cahujín eyta ajcá ji bécaýatan, ruh̃wá báreyra. Eyta sehnác chácayat Moisés chihotá caba yajcáyqueyra.

¹¹Acsar síh̃awi. Ah uch cutar bitara útara rehquey tamo síh̃awi. Baat ítitan, Jesucrístoat is cuacúr beyin ac bar cab cu racaro. Récaji isat chihotá rahcyat is cuacúr beyin ac anto cab cutiro. Cuat ahra bar cab cu racaro. Beyin ac cab cu rac etar Sir tamo síh̃wataro. ¹²Uwat ur ay bár yajquíc ey etíc bar cab cu rajacro. Eyta cat is cuacúr beyin acu cat bar cab cu rajacro. Eyta cuácayat isat ur ay bár yajquíc etátaro. Cuat ur ay yajcátaro. Ur ay yajcayat, Sisramat is burbar yajca báreyra. ¹³Isat ur ay yajcátaro. Ur ay yajcata bin yajcátaro. Simat yin sácati ítataro. Isár sinti ítataro. Rahra rahra técuati es yajti ítataro. ¹⁴Cuat Cara Jesucrístoat yajquír eyta isat cat eyta yajcátaro. Ur ay bár yajquín sih̃wac etátaro. Ur ay bár yajca racar isóc etátaro.

No critiques a tu hermano

14 ¹Ahra chiwa ima urá icar Sir chihotá caba sinti bin ojcor waquinro. Eyin quin ay ténawi. Cuatán uw ima ur icar sih̃wac chihotá ques rahra rahra wayuti jaw̃ i. Ey chihotá ques wayún acui batro. ²Uw cahujinat imár ur icar ajc bahnác cohtá síh̃waro. Cuatán urá bow̃ conu éyinatra ajc bahnác cohti bachwata síh̃waro. ³Eyta cuácayat ba bíyinat ajc bahnác bachuti cohcaýat, cahujín ajcá bár chati jaw̃ i. Icúr bi cohti bachúc eyin ajcá bár chati jaw̃ i. Rahra cat ba bach yájquinat cat ajc bahnác cohca eyin ajcá bár chati jaw̃ i. Cohjor bin cohquíc síh̃wati jaw̃ i. Cuatán uch síh̃awi. Sir imát eyin cat ajcá jiro, síh̃awi. Sirat eyin cat ajcá ji etar baat cat eyin ajcá ji béowi. ⁴¿Ba bitara rehquít istiy cacúm urá wahitqui? Ima cáratrun ey urá uní wahitátaro. Ay yájctara, ay

yájtítara urá uní wahitátaro. Eyta cuácayat baatán eyin urá wahitín acui batro. Sir imát éyinat ay yajcayta acu urá wíacayqueyra. Wíacayat ay yajcáyqueyra.

⁵Uw cahujinat síhwaran, semán icar riy istiy ayan cuít síhwaro. Cuat cahujinat síhwaran, riy bahnacan owáraro. Eyta cuácayat uwat bi chihtá síhwaractara, bahnác owárara síhwaractara, riy istiy ayan cuít síhwaractara, imár ur icar bitara síhwaractara eyta wácati yajcátaro. ⁶Bíyinan riy istiy cuitar bach yajcáyatan, éyinan Sir tamo síhwar eyta yajcaro. Bíyinan icuran biyan ajc bahnác coháyatan, Sir quin “oquéy,” waquí cohcaro. Sir tamo síhwar eyta cohcaro. Bíyinan bach icar ruwa cohti jácayatan, éyinat cat Sir quin “oquéy,” wacaro. Eyat cat Sir tamo síhwar ruwa cohti bachuro. ⁷Síratan íjmár ístír chihtá cuitar itín acui chátiro. Isan estají réhctara, íjmár chihtá cuitar itín acui batro. Chiníctara íjmár chihtá cuitar chinín acui batro. ⁸Cuatán isan estají rehquíctara, Sir tamo síhwarabrar ítata binro. Isan chiníctara, chiníc tacat, en bic tacat Sir tamo tehmoti síhwarata binro. Etarwan estají rehquíctacat, chiníc tacat, isan Siray chácayqueyra. ⁹Jesucristo chinír sícor estají yehnjacro. Eyan sácájaquin acu cat, estají bin acu cat cara rehquí acuan eyta chinír yehnjacro.

¹⁰¿Bitara rehquí rabin cahm icar tewíqui? ¿Bitara rehquí rabin tamo cuayín síhwaráqui? Is bahnáquinan Sir cac cahmar chácayqueyra. Eyta chácayat, is urá ístáyqueyra. ¹¹Sir carit cuitar wacaro:

Sirat wacaro: “Asan Sítro. Aját uní wacaro. Uw bahnaquin as cac cahma chácayqueyra. As tamoan caran cuít síhwarayqueyra.

Bahnáquinat as ojcor ay wacáyqueyra,” wacaro.

¹²Etarwan bahnáquinat ístiyát cat, ístiyát cat imát bitara yajáctara Sir ca cahm ehcwáyqueyra.

No hagas tropezar a tu hermano

¹³Eyta chíhtara isat rahra rahra istiy cahmí icar tewí ítataro. Tewíti cuar uchta yajti jawí. Baat icúr bi yajquíctar ba rábinat Sir chíhtá ruhwarátatara, eyta yajti jawí. ¿Rábinat ba oquís Sir chíhtá wácájaqui? ¹⁴Cara Jesucristo chíhtá cuitar aját ítitan, icuran coh coh bántara ey bachuti cóhtaro. Cuat bíyinan cohjor bin síhwarabrar coháyatan, éyinat Sir tayar yajcaro. ¹⁵Uch síhwaráqui: baatán icúr bi bachuti coháyatan, rabin cuécwata óraro. Eyat síhwaratara cohjor bin sehwar cuécwata óraro. Eyta cuácayat, baat rab cac cahm eyta cóhctara, rabin racar bár rehquíctar eyta cohta óraro. Eyta cuácayat rabin ruhwaráqui acu, baat cat rabat bachuquey cohti etwí. Jesucristo eyin cuitar cat tayar tunin acu chinjáctar eyin ruhwaráqui ac cohti bachuwi. ¹⁶Baat ítitan, bachuti reháyatan ayro. Cuat cahujinat ítitan, bachuti reháyatan ay batro. Eyta cuácayat cahujinat baat yajquey ojcor ay bár tewí acu bachutira yajti jawí. ¹⁷Uwa Sir cara rehquey chíhtá cuitar itquin acura ir eyan, ruw eyan, bacú eyan bachuti tacat bachúctacat bitarach batro. Cuatán bíyinan Sir cara rehquey chíhtá cuitar eyta ítyatan, éyinat ur ay yajcaro. Rahra rahra tan wan ítro. Sir Ajcan Cámuran Ey chíhtá cuitar ahní ítro. ¹⁸Bíyinan Jesucristo tamo síhwar eyta ítyatan, Sirat éyinan rácatro. Uwat itit cat, éyinan ur ayro.

¹⁹Eyta bira isat rahra rahra tan wan jaquin acu bitara útara ur ay yajcátaro. Rahra rahra istiy quin Sir chihtá waca ayti acu ur ay yajcátaro. ²⁰Baat icúr bi ira bunar rehquíc oquís rábinat Sir chihtá wácata óraro. Eyta cuácayat eyin quin Sir chihtá waca ayti jawĩ. Sir ub cahmar icúr bi iran ajc bahnacan restá batro. Eyta cuar baat icúr ira coh r ques cahujinat Sir chihtá wácayeyra ay batro. ²¹Cuat rábinat Sir chihtá wácati acu ruwa cohti bachwáyatra ayan cuitro. Eyta acu bacú yahti cat bachwayat, bitara útara yajti cat bachwayat, ayan cuitro.

²²Baat ajc bahnác ruwa cohtá síhw̄actara, eyta chihtá Sir ub cahmar síhw̄awi. Behmarat yarsa cohcyat ojcor tayar bár síhw̄ayat, óhbcro. ²³Cuat bíyatan cohjor bin síhw̄a rabar cóhyeyra, eyan tayar chi rehcaro. Im ur icar ay bár síhw̄a rabar bachuti cohcyat tayar chi rehcaro. Imár urá icar eyta yájcajar síhw̄a cuar yajcayat tayar chi rehcaro.

Agrada a tu prójimo, no a ti mismo

15 ¹Is Sir chihtá caba cájaquinat caba cati eyin tamo éyinan cuayin síhw̄ati jácataro. Isan ijmár istir ahní itin síhw̄ati cuar, ²isat cahujín tamo cat síhw̄ataro. Eyin tan wan rehcyata acu éyinat Sir chihtá acsar sínayta acu eyin tamo síhw̄ataro. ³Uch síhw̄awi. Jesucrístoat im istir ahní itin acu yájtiro. Sir carit cuitar ey ojcor uchta wacaro: “Bah quin ajc ahsín tew̄ ic ora eyan as quino tew̄ jacro,” wacaro.

⁴Uchicri Sir carit cuihsú bahjác eyan, is siw̄ in ac cuihsú bahjacro. Isat ey sinir cuitar isan chihtá wácati ohbac ítataro. Cuécuti ítataro. Eyta ita rabar Jesucrístoat is cuitar waquíc acor ítataro. ⁵Aját ba cuitar Sir ojcor conro. Siran is cuitar ima chihtá wácati acu yájquibro. Is tan wan it áyquibro. Aját Sir ojcor conro. Ba quir bin rahra rahra tan wan chácayta acu conro. Jesucristo chihtá cuitar eyta tan wan chácayta acu conro. ⁶Tan wan chácayat, ba bahnáquinat urá istán cuitar Sir ojcor ay tew̄ áyqueyera. Is Cara Jesucristo Tet ojcor ay tew̄ áyqueyera.

El evangelio anunciado a los que no son judíos

⁷Baatán rahra rahra ajcá ji béowi. Jesucrístoat ba ajcá ji beyar eyta baat cat rahra rahra ajcá ji béowi. Baat eyta rahra rahra ajcá ji bécyat uwat Sir tamo ay síhw̄ayqueyera. ⁸Aját ba quin wacaro. Jesucristo judío in ac cacmír yehnjacro. Sirat récaji Abraham quin wac bahjác caba yajquín acu cacmír yehnjacro. Eyta yajcayat, uwat ítitan, Sirat wac bahjác eyan teh mótiro. ⁹Judío bár binat cat Sir ojcor ay tew̄ ayta acu cacmír yehnjacro. Sirat eyin racar cue rehquír obir yajc ojcor ay tew̄ ayta acu Jesucristo eyta yehnjacro. Sir carit cuitar ey ojcor uchta wacaro:

Judío bár bin cuajá acat bah ojcor ay tew̄ inro. Bah ajc ojcor tanro.

¹⁰Bucoy cat wacaro:

Judío bár binu, judío in owár ba cat ahní chaw̄ i.

¹¹Bucoy cat wacaro:

Judío bár binu, ba bahnáquinat Sir ojcor ay waw̄ i. Uwinu, ba bahnáquinat ey ojcor ay tew̄ i.

¹² Acsar Isaíasat cuihsú bahjacro:

Sera ajca Isaí sicar bin cohná bica rehquít ey yehnáyqueyra. Judío bár bin ayin acu yehnáyqueyra. Judío bár binat ey yehníc acor ohbac itro.

¹³ Sir imát uw acu ay yajquín wac bahjác acor quir binan itro. Aját Sir ojcor ba cuitar conro. Ba ey tamo síhw̄ayat, eyat ba ohbac ahní chácayta acu conro. Sir Ajcan Cámuran Eyat ba quin ajcan urán wícayta acu conro. Eyta wícayat eyat wac bahjác acor ba séoti ítayqueyra.

¹⁴ Rábinu, ajmarát séhw̄atan, baat caba yajcaro. Ba ur ayan caba yajcaro. Sir chih́tá cat ay sínjacro. Ay sinjac etar baat acsar cahujín quino cat ey chih́tá yarsa síw̄ataro. ¹⁵ Eyta cuar aját ba quin ayin acu carit uch rooti cuihsujacro. Ajatán carit cuihsúr ba quin áyata bini bár ora cuar cuihsúr ayro. Sirat as quin urá wijac etar cuihsúr ayro. Chih́tá baat récaji rahjác ey bucoy síhw̄ayta acu cuihsujacro. ¹⁶ Sirat as quin urá wícayat as siw̄quib yehn áyjacro. Judío bár bin Jesucristo chih́tá siw̄in acu yehn áyjacro. Eyta cuácayat judío bár binan Sir chiwa yinayta acu aját siw̄ro. Judío bár binan eyta yinyat Siran ahní rehácayqueyra. Eyinan Jesucristo chiwa yinyat, Sir Ajcan Cámuran Eyat Sir imáy ajquír chácayqueyra. Sir imát asan eyta yehnín wajác etar ba quin carit uch cuihsuro.

¹⁷ Etan Jesucristo chih́tá cuitar yajác ojcor ahní ehcwata binro. Ajmarát Sir acu yajác ojcor ahní ehcwata binro. ¹⁸ Jesucrístoat as cuitar yajác ojcor ehcwáy raújacro. Cuat chih́tá ajquír bi ehcútiro. Judío bár bin quin Sir chih́tá cac áyayta acu Jesucrístoat as cuitar yajacro. Tew̄ ír cuitar cat, canar yajquír cuitar cat, ¹⁹ icúr bi bár sicar bin yajquír cuitar cat, Sir Ajcan Cámuran Ey chih́tá cuitar cat eyta yajacro. Etar Jerusalén cuaquir Iliria cuwayta ibit cajc aŵat eyin quino aját Jesucristo chih́tá caba ehcujacro. ²⁰ Bi cajc cutaran Jesucristo chih́tá anto ehcútitara, aját ey cajc cutar ehcwá racar rehjecro. Cahujín quin Jesucristo chih́tá ehcú bahjác cajc cut ehcú cun batro. Cuatán cahujín quin Jesucristo chih́tá ehcuti cuitar ehcwá rácatro. ²¹ Sir carit cuitar wacaro:

Biyin quínoan ey ojcor ehcútitara, éyinat cat ey itchácayqueyra. Bíyinatán ey ojcor tew̄ ic ráhctitara, éyinat cat ey chih́tá ur icar ay rahcuáyqueyra.

Pablo piensa ir a Roma

²² Récaji ba quin ben séhw̄ajac cuar bitiro. Jesucristo chih́tá anto ehcuti bin quin ehcwá racar rehquít, bitiro. As búcoyan búcoyan ba quin bi cun cuar, récaji erar biti tijcujacro. ²³ Cuat ahra Iliria cajc cutar tas aját Sir chih́tá caba ehcú bahjacro. As búcoyra Iliria cajc cut ínicra icúr obir béjetro. Ba quin úchicri be racar rehjecro. ²⁴ Eyta bira asa ba quin tiw̄ España cajc cut cuwín ben séhw̄aro. Ba quin cur erar ba owár inic cuanín séhw̄aro. Baatán as acsar ben acu as icúr táyoctara wícata séhw̄aro. As tanra eyta séhw̄aro. ²⁵ Eyta seh̄wac cuar, ibtu as Jerusalén benro. Jesús chiwa acu ray racar wijac ey Jerusalén bahcay benro. ²⁶ Macedonia cajc cut uwat cat, Acaya cajc cut uwat cat ray wica racar rehquít bar sécuajacro. Jerusalén cuitar Jesús chiwa yinjaquin cuayin acu ray sécuajacro. ²⁷ Imarat wica racar rehquít sécuajacro. Aját ítitan, éyinat judíoín wícayat yarsa wícata binro. Judíoínat

Sir chihotá acsar judío bár bin quin ehcujacro. Eyta ehcujác etar judío bár binat ima ray sicar bin judíoín quin wícata binro. Ray bár bin quin, oya bár bin quin, ira bár bin quin wícata binro. ²⁸Ray bahcay cu bah cur car, sécuajaqueyin at icar caba chaquir car, asa ba quin tiv̄ España cajc cut benro. ²⁹Asa ba quin cucayat, as cuitar chaw̄ cuar Jesucristoat ba ohbac chácayqueyra. Ba caba obir yajcáyqueyra.

³⁰Rábinu, aját Cara Jesucristo chihotá cuitar ba quin wacaro. Sir Ajcan Cámuran Ey chihotá cut ba rahra rahra sehnác etar ba quin wacaro. As cuitar Sir ojcor conwi. Aját ey ojcor conár eyta, baat cat eyta conwi. ³¹Judea cajc cut Sir tamo séhw̄ati bin at cahmar Sirat as síwayta acu conwi. Aját ray béquican Jerusalén uwat ahní cácyta acu Sir ojcor conwi. ³²Eyta conyat, Sir chihotá cuitar asa ba quin ahní cuwáyqueyra. Isa rahra rahra Sir chihotá tan wan tew̄ áyqueyra. ³³Aját ba cuitar Sir ojcor conro. Sira is urá ohbac cháquibro. Sira ba owár rehcyta acu conro. Amén.

Saludos personales

16 ¹Aját ba quin Jesús chiwa ajca Febe ojcor wacaro. Eya ur ay biro. Eya Cencrea pueblo cuitar chauwícuanu. Eya Jesús chiwa yehnjáquinro. ²Ey quin tan wan ténawi. Jesús chiwa quin bitara tenátatara, ey quino eyta ténawi. Eyatan quir bin cuitar cat, as cuitar cat bitara útara ay yajacro. Eyta cuácayat ey cuitar bitara yajcátatara eyta yajw̄ í.

³Aját Priscila tamo, Aquila tamo seh̄wac wac ayro. Eyinat as cuitar Jesucristo chihotá cat ehcujacro. ⁴Eyin as siway yinír cat sácata yajacro. Sácata yajác cuar as síujacro. Eyta síujac etar aját eyin quin “oquéy,” wacaro. Sir uw judío bár binat cat eyin quin “oquéy” wacaro. Eyin bahnáquinat eyta wacaro. ⁵Priscílain, Aquílain usar Jesús chiwa sécuajquin tamo cat aját eyin tamo seh̄wac wac ayro. Epeneto tamo cat seh̄wac wac ayro. Asia cajc cut uw sicar bin eyan récaji Jesucristo chiwa yinjacro. ⁶María tamo cat seh̄wac wac ayro. Eyat ba acu canarán cuít yajacro. ⁷Andrónicoin tamo cat, Júniasin tamo cat seh̄wac wac ayro. Eyinan as cahujinro. Asi jor cárcel icar tunjác binro. Aját anto chihotá cati cuat éyinat cahmor cájaquinro. Sir uw cárinat sihw̄at, eyin urá ayan cuitro. ⁸Amplias tamo cat seh̄wac wac ayro. Sir chihotá cuitar, aját eyan ajcá ji chácara. ⁹Urbano tamo cat, Estaquis tamo cat seh̄wac wac ayro. Estaquis eya aját to íw̄oquinro. Urbano eya as cuitar Jesucristo chihotá ehcúquibro. ¹⁰Apeles tamo cat seh̄wac wac ayro. Eya Jesucristo chihotá ques ruh̄wuyat, wácati tan újacro. Aristóbuloín tamo cat seh̄wac wac ayro. ¹¹Herodión tamo cat seh̄wac wac ayro. Ey as cahujinro. Narcísoin owár bin bíyinan Jesucristo chíwatara, eyin tamo cat seh̄wac wac ayro. ¹²Trifenin tamo cat, Trifosin tamo cat seh̄wac wac ayro. Chaunín éyinat Jesucristo acu is cuitar canar yajcaro. Pérsida tamo cat seh̄wac wac ayro. Wiw̄ eya as acu urá ay tan ay biro. Eyat Jesucristo acu canarán cuít yajacro. ¹³Rufó tamo cat ey ab tamo cat seh̄wac wac ayro. Rufó eya Jesús chiwa ayan cuít yehnjáquinro. Ey abá as acu cat abitró. ¹⁴Asíncritoin tamo cat, Flegonteín tamo cat, Hérmesin tamo cat Patrobasin tamo cat, Hérmasin tamo cat, Sir uw eyin owár itquin tamo cat seh̄wac wac ayro. ¹⁵Filológoin tamo cat, Júliain tamo cat, Néreoin tamo cat, Nereo chitín tamo cat, Olimpasin tamo cat

sehŵac wac ayro. Eyin owár itquin Sir uw bahnaquin tamo cat sehŵac wac ayro. ¹⁶Ba rahra rahra tan wan ténawi. Jesucristo chiwa cajc istiy cuitar sécuajaquinat, cajc istiy cuitar sécuajaquinat, ba tamo sihŵac wac ayro.

La advertencia final

¹⁷Rábinu aját ba quin uní cuitar wacaro. Bíyinat ba Jesús chiwa wahw̃ ún tew̃ íctara, bíyinat ba quin Sir chihtá waca aya rácartara, eyin cahmor yají ítuwi. Eyin íw̃oti jaw̃ i. ¹⁸Uwa éytainat is Cara Jesucristo ajcá batro. Ey tamo síhŵatiro. Cuat imár chihtá cuitar itic etar túrarir yajcaro. Imár chihtá cuitar yajca racar eya yajcaro. Eyinat bachabách tew̃ a rabar, tew̃yat tew̃ a rabar urá bow̃ bár bin cayar yajcaro. Eyta bira eyin íw̃oti jaw̃ i. ¹⁹Uwa bahnáquinat ítitan, baatán Sir chihtá caquir itro. Eyta cuácayat asan ahniro. Etar acsar ay bi tamo sihŵan ac urá ji rehŵ i. Cuat ay bár bi tamo síhŵati ac behmár cayar yajti ac urá ji chaw̃ i. ²⁰Urá ji chácayat Sir imát ba cuitar Satanás burbar yajcáyqueyra. Aját ba cuitar Sir ojcor conro. Is Cara Jesucrístoat ba sehnác chácayta acu conro. Ba ohbac ítayta acu conro.

²¹Timoteo as owár Sir chihtá ehcúquibat ba tamo sehŵac wac ayro. Lúcioinat cat, Jasóninat cat, Sosípaterinat cat ba tamo sehŵac wac ayro. Eyan as cahujinro.

²²As Tércioat Pablo chihtá cuitar carit uch cuihsuro. Aját cat ba tamo séhŵaro.

²³⁻²⁴Gáyoat cat ba tamo sehŵac wac ayro. Gayo eyat is acu Jesús chiwa owár bin acu ubach wícaro. Erástoat cat, Cuaróat cat ba tamo sehŵac wac ayro. Erasto eyat pueblo ray obir yájquibro.

Alabanza final

²⁵Etan aját Sir quin “oquéy,” wacaro. Sirat ba urán to wícaro. Aját Jesucristo chihtá ehcwayat, eyta wícaro. Chihtá eyan anto ehcuti bi awan ehcwáy yinjacro. ²⁶Uwat récaji ehcuti cuat ahra uw bahnáquinat orac rahcuayta acu ehcwáy raújacro. Sirat eyta ehcún ac waquírá chájacro. Sir chihtá ehcúquinat récaji cuihsú bahjác siw̃ ir cuitar eyta ehcwáy yinjacro. Uwat ey chihtá cácaayta acu, Sir tamo síhŵayta acu ahra ey ehcwáy yinjacro. ²⁷Sir im ístiran urán cuitro. Ey ojcor uwat ay wacátaro. Cabar tinic tacat bur cut suw cut eyta wacátaro. Jesucristo chihtá cuitar eyta wacátaro. Amén.